


五十六



五四

五十四

隆慶六年至萬曆三年

國權

鹽官談遷孺木著

神宗範天合道哲肅敦簡光文章武安仁止孝顯皇帝諱翊鈞

穆宗莊皇帝子也母貴妃李氏嘉靖癸亥八月生隆慶戊

辰受冊皇太子天表嚴重廣額豐額目光四射年十歲

隆慶六年五月庚戌大行賓天皇太子主喪已刻傳太監馮

保入司禮監保狡黠嘗訐故司禮監陳洪高拱弗善也至是

掌司禮太監孟冲譖逐之薦保據其位

辛亥馮保稱遺旨詔皇太子曰朕不豫爾即皇帝位一切

禮儀自有部覆爾依閣臣并司禮監輔導進學修德用賢使
能母事怠荒保守帝業廷臣聞之甚駭謂閣人不預顧命且
詔授工保安得自攘也始大行疾篤促召閣臣至恭默室
北張居正吏妣曠奔於前持密函高拱問誰何曰與馮司禮
拱問何所言居正色動遽曰遺詔事拱默然我當國事當首
裁何所私而內之也俄拱奉遺詔及囑皇太子俱云同司
禮監則居正為馮保地云
禮部左侍郎王希烈往天壽山擇陵
初命河南按察司清軍道兼兵備給勅印專轄開封諸屬縣

及宣武衛

刑科給事中朱南雍請廣東官久任部覆從之

提督兩廣軍務兵部左侍郎殷正茂以倭犯廣東新寧惠來
陷雷白錦囊所城轉入高雷廉瓊境官兵先後斬獲千餘級
條諸臣功罪電白知縣蔣曉錦囊所千戶侯安邦棄城遁下
臺訊

六月朔刻日食時百官哭臨思善門畢赴禮部行護日禮
青服角帶停鼓樂禮畢仍素經辦事閣臣需召不往
丁巳禮部工登極儀注

德平伯李銘卒

庚申大學士張居正同司禮太監曹憲下山陵居正請視嘉
靖七年例遣禮工卿貳及科道各一於是戶部尚書張守直
禮部右侍郎諸大綬工部左侍郎趙錦禮科都給事中陸樹
德江西道御史楊家相工部主事易可久同詣天壽山潭谷
嶺復營視山陵

甲子一上即皇帝位以明年為萬曆元年大赦詔曰我國家
光啟鴻圖傳緒萬世祖宗列聖創守一心二百餘年重熙
累洽我皇考大行皇帝明哲作則恭儉守文虛己任賢厲

精圖治蓋臨御六載而天下宴如四裔來賓兆民蒙福方茲
貽之永賴遽龍馭之上賓顧命朕躬屬以神器朕方筮、在
疚不忍遽聞而文武群臣及軍民耆老人等合詞勸進至於
再三辭拒弗獲乃仰遵遺詔俯順輿情於六月十日祇告天
地宗廟社稷即皇帝位朕以涼德方在冲年惟上帝之眷命
孔敷祖宗之基業至重兢、夙夜懼不克堪尚賴文武親賢
共圖化理爰暨萬方黎庶與有嘉休其以明年為萬曆元年
與民更始所有合行事宜開列於後云云於戲續大承休惟
奉累朝之成憲布德施惠用洽萬國之歡心將升大猷在謹

初服詔告天下咸使聞知

丙寅賜京朝文武諸臣金幣有差

丁卯大學士高拱上新政五事曰祖宗御門聽政凡各官

奏事俱玉音親答以見政自上出隆慶初閣臣擬答人情玩

愒今後令司禮監每日開小帖明寫某宜答某不宜答某該

某衙門知道皇上御門時待各官奏事親答曰祖宗朝

回即奏事至申刻又奏事內侍先設御案請覽奏即出門外

待覽畢發閣隆慶初不設覽本御案司禮監官上奏先帝

手接一二或全不覽今乞復舊凡章奏盡呈覽畢送票票

後再呈覽果妥然後發行曰事必面奏每二七日朝後御文

華殿臣等有奏即奏若要事容不時請見開講日臣即於講

後奏之庶情無壅蔽曰事議停當內閣官專看詳奏擬若未

當上意仍發內閣詳擬或未經發擬徑自內批容臣等執

奏其推陞廢官及各項陳乞與一切雜本近年司禮監徑批

出內閣係看詳章奏之官章奏乃有不至閣者豈不失職曰

官民本詞行止據理無留中不出者本既留中其可稽考今

後通政司封進開教該科倘有未下科臣奏討明白時太監

馮保方居中用事登極日保自升御座三傳見者異之拱跡

上保謂如此則閣權重司禮輕因內批云照舊制行拱得旨
曰安有十歲天子而能自裁乎內臣還報保失色故謬其詞
激上曰高先生云十歲兒安能決事上怒入告兩宮
皆訝之拱初善張居正負氣倨直前秉銓居正以言餽覺之
猜防積釁居正陰結保自固十歲兒之說釀毒不可解拱計
初政保即持我何以善後遂上言臣首跡未發跡未蒙允恐
失人心之望仍封上并補本再進望皇上監察如敢差錯
自有公論自有祖宗法度其孰能容保不得已留原跡以
補跡下擬有旨卿等所奏於時政有裨具見忠藎即擬行

癸酉上御平臺特召張居正慰勞之曰皇考屢稱先帝
忠臣居正頓首謝因曰方今要務在守祖宗舊制不必紛
更上從之賜酒饌金幣退奏臣當為祖宗遵憲不敢臆更
為國家惜才不敢私用上又善之

巡撫山西右僉都御史楊綵奏罷沿邊墩牆仍并力修堡寨
從之

甲戌提督兩廣軍務兵部左侍郎殷正茂奏平河源從化英
德等賊自五年十月用兵萬有三千餘人民兵不與焉今閏
二月班師斬六百七十二級

工部右侍郎熊汝達提督陵工

命吏部尚書楊博解兵部事回吏部

尚食監太監穆進德請復薦新銀魚以詔停採辦不許

丙子 上御宣治門緣服

錦衣衛左都督朱希孝往來督視陵工

丁丑管中府事武進伯朱承勳卒

遣中使問大學士高儀疾是日卒儀字子象錢塘人嘉靖辛

丑進士授翰林編修累官禮部尚書

先帝初郊社分合大

祀之配享元配繼后之祔別裁酌右義預顧命即疾甚贈太

子太保謚文端

戊寅管中府事寧陽侯陳大紀卒

己卯兵科左給事中吳文佳江西道御史楊家相督察陵工

庚辰召見張居正於平葦議兩宮尊號張居正既柄政慨然

任天下之事專尊主權課吏實嘗言 高皇帝真得聖之威

者也 世宗能識其意是以高卧深宮之中朝委裘而不亂

今 上世宗孫也奈何不法祖

申飭漕期歲十月民輸粟十一月漕卒受粟十二月發舟二

月過淮三月歷閏四月抵張灣從工部尚書朱衡議之

辛巳定昭陵

命兩京文武官四品以上各總督巡撫等俱自陳去留取上裁

復設開封府捕盜通判

南京刑科給事中周守愚劾守備太監張宏以閏月營軍折

操市恩并摘兵部尚書王之誥守備懷寧侯孫世忠協同守

備靈璧侯湯世隆依違坐視工報聞

禮部尚書呂調陽兼文淵閣大學士直閣

吏部尚書楊博言先帝元年奉詔考察京官二年朝覲考

祭三年遵例京察四年奉諭考察言官五年又朝覲考察六

年間五考刻除殆盡今若拘例殊非清平之治容臣等課實

果有其人即斥否則寧虛其名上善之

是月貴陽府雨桂子

七朔申朔大雷雨侯止享太廟

起譚綸兵部尚書

丙戌上穆宗契天隆道淵懿寬仁顯文光武純德弘孝莊

皇帝尊謚

總督漕運右副都御史王宗沐奏海運抵張灣

丁亥頒尊詔謚於天下

前吏部右侍郎陸樹聲為禮部尚書浙江按察使趙賢為右
僉都御史巡撫湖廣兼督理軍務應天府尹杜拯為南京太
僕寺卿在假尚寶司少卿戚元佐許終養

初通漕運於密雲尋加密雲五萬石先年總督侍郎劉應節
以密雲白潮二水可漕向二水分派俱至牛欄山始合故通
州刺船止於山下至龍慶倉須陸輓今白水徙城南近踪渠
入於白舟可達密雲矣
已丑諭兵部申飭邊防

吏部京察片吏部員外郎穆文熙都給事中宋之謙程文等
三十三人吏部主事許孚遠御史李純樸杜化中胡峻德盛
時選劉日睿張集左右給事中涂夢桂楊鏐周美張博等五
十三人調外又光祿寺丞張齊何以尚尚寶司卿成鐘聲調
外司丞陳懋德閑任高拱之黨略盡

庚寅有鐘飛於華亭縣之一團視其款自閩來

福建左布政使朱綱為應天府尹

壬辰上 孝懿貞惠順哲恭仁儂天襄聖莊皇后尊謚

癸巳右通政何永度罷韓楫調陝西布政司右叅議太常少

卿劉淳調外

設昭陵衛

乙未廣吉士李學一為刑科給事中陝西道御史胡峻德為
滁州判官戶科左給事中張博為鄧陽丞右給事中涂夢桂
為濟縣丞

詔均兩畿山東河南河夫於各州縣毋偏累瀕河者

丙申科道拾遺太常少卿呂藿調南京巡撫甘肅右都御

史楊錦調外南京工部尚書陳紹儒禮部右侍郎歐陽誥巡

撫陝西右都御史溫如璋巡撫山西右都御史楊綵開

住

廣西巡撫右僉都御史郭應聘平大屋等村賊斬五十餘人

都察院請復巡視居庸山海二關御史詔報罷

丁酉內官監太監張誠請給提調陵工勅閣臣言莞工太監

有勅遂不許

吏部題建言罪廢諸臣尚書司丞鄭履淳戶科左給事中李

已吏科給事中石星工科給事中陳吾德俱復秩禮科左給

事中陸鳳儀雲南道御史詹仰庇更議報可

吏科給事中維遵等薦戶部尚書劉體乾其在籍尚書馬森

郭乾譚太初劉永侍郎楊巍會都御史海瑞少卿立檯叅政
溫純等有旨亦復令饒州兵備道兼轄南昌之新建進賢其
南康之星子都昌九江之湖口悉聽整飭
暑讞釋輕繫三百四十三人

己亥戒諭百官曰近歲以來士習澆漓官方利缺鑽窺隙竇
巧為躡取之媒鼓煽朋儔公事擠排之術詆老成恬退為無
用謂讒佞便捷為有才受惡橫生恩仇交錯遂使朝廷威福
之柄徒為人臣酬報之資朕初承大統深燭弊源亟欲芟除
念茲始御話鉏或及於芝蘭密網恐驚子鸞鳳用去太甚薄

示戒懲餘皆曲賜矜原與之更始書不云乎無偏無黨王道
蕩、無黨無偏王道平、自今以後其精白乃心恪恭乃職
毋懷私以罔上毋持祿以養交毋依阿澳泐以隨時毋導沓
滄訛以亂政任輔弼者當協恭和衷典銓衡者當虛心鑒物
有官守者或內或外各分猷念有言責者公是公非各奮謹
直大臣有正色立朝之風小臣有退食自公之節於是朝清
政肅道泰時康爾等亦皆垂功名於竹帛綿祿蔭於子孫顧
不美哉若沉溺故常膠守塗轍朝廷為必可背法守為必可
干則我祖宗憲天甚嚴朕不敢赦大學士張居正所草也

詔下百官惕然

起李母達提督騰黃河南布政使胡禎為太常寺少卿提督
四夷館

庚子禮部工 兩宮尊號仁聖皇太后陳氏慈聖皇太后李
氏

于慎行曰前代人嗣位有太后者生母止稱皇太妃我朝
始自 孝廟並稱太后惟嫡母加上徽號二字茲加 兩
宮徽號蓋欲尊慈寧也既諭之明日居正於東閣會揖時
謂禮部曰故事中宮加二字既同為太后多二字何妨侍

即王希烈署部篆曰諾於是 兩宮並尊慈寧即不加多
亦不減一字矣時 上冲聖虛心以聽輔臣肯力爭一言
引右曲當亦兩宮之禮無一人片語可見士氣人心日以

萎靡矣

勅太子少保工部尚書朱衡等以陵工也往來閱視右侍郎
熊汝達等專工提督京營戎政彰武伯楊炳協理戎政兵部
右侍郎王遴提督軍匠掌錦衣衛事太保兼太子太保左都
督朱希孝往來督視管錦衣衛事署指揮同知楊俊卿專督
工程又勅內官監太監周宣等提督工程

辛丑命總督倉場戶部尚書王國光回戶部南京戶部尚書
王之誥改刑部尚書南京禮部右侍郎汪鏜為禮部右侍郎
筦國子監事起楊巍兵部右侍郎南京右都御史張瀚為南
京工部尚書
定福建餉額
江陵公安松滋枝江宜都石首監利大水命蠲恤
紫荆關叅將張玩為署都督僉事神機營右副將南京後府
僉書劉勇光充五軍營右副將蘓松叅將黃應甲充副總兵
鎮守江南

辛亥頒 兩宮尊號詔

大名廣平順德天鼓大鳴

壬子外戚回安伯陳景行加歲祿百石都督同知李偉封武

清伯歲祿千石 李偉其先翼城人縣東南十五里曰澮高山
世宗時有異人言此山有王氣當生貴人偉

生 慈聖太后徙
漸縣至是果驗

安鄉伯張鑑為前軍都督僉事

明寅朔故惠安伯陳鍾贈太保

樂陵王觀燔薨謚恭僖

遣給事中四人勞各邊卒六十六萬四千三百十有九人人

各二緡

乙卯兵部奏土蠻欲犯遼東約薊遼互援從之

改封庶慎夫人徐氏為祐聖夫人從子錦衣衛千戶徐鴻為錦衣衛指揮僉事以侍聖母勞也

丙辰以海運成巡撫都御史梁夢龍王宗沐各進俸一級賚金幣

丁巳進張居正左柱國中極殿大學士詹尚寶司丞呂調陽太子少保武英殿大學士東宮官馬自強陶大臨為禮部右侍郎

大學士呂調陽祭孔廟

戊午上祭太社太稷

己未上御宣德門視事

廣西道御史胡濤劾大理寺卿陳一松陪祀孔廟於門內乘輿奪俸六月

司禮太監馮保鄭真等各賸錦衣衛正千戶曹憲王臻詹副千戶孫秀等賸百戶陶奉等所鎮撫俱東宮舊勞

勅駙馬都尉許從誠成國公朱希忠彰武伯楊炳護喪以將山陵也

庚申連東巡撫張學顏奏「入犯副總兵趙完等追斬十八級

鎮遠侯顧寰掌左軍都督府事

錦衣衛左都督朱希孝加祿三十六石指揮使余廕為都指揮僉事署指揮同知楊俊卿為署指揮使時陞賞官旂等六百六人俱侍東宮者

辛酉張居正請八月開經筵從之

故德平伯李銘贈太子太保

癸亥張居正乞更定常朝三六九日御門聽政餘日俱免朝

參但御文華殿猶講從之

雲南黔國公沐昌祚進馴象一

甲子議祀 宣宗禮科都給事中陸樹德言 憲宗升祔祀

懿祖 孝宗升祔祀 熙祖皆八世今 宣宗於 穆宗

為五世欲祀之是不可不議也 皇祖特建世廟奉 睿宗

至嘉靖二十四年始祀太廟夫世廟則世、不遷又不可不

議也禮以順人為至孝以安祖為大昔年世廟殿柱產芝謂

神既所臨倘推其意奉 睿宗於世廟免祀宣宗孝莫大

焉禮部覆曰七世之廟可以觀德蓋古者一世為一廟非一

君為一世故晉之廟十一室而六世唐之廟十一室而九世
宋自太祖上追四祖至徽宗始定為九世十一室以太祖太
宗同為一世也徽宗與哲宗高宗與欽宗同一世無所祧及
光宗升祔增為九世十二室並祀於太廟今宣宗至穆
宗凡六世合二祖僅八世准宋世可以無祧但於寢殿左
右各增一室上命再議

于慎行曰嘉靖中

孝烈升祔奉祧

仁廟萬曆改元

穆宗升祧奉祔

宣廟皆非禮也謹按太廟同堂異室

分別昭穆及

世宗創建九廟奉

太祖為太廟成

祖為世室而以

仁宣英憲孝武六廟為三昭三穆與

太祖之廟而七九廟既災仍復同堂異室之制而升祔

睿宗此後寢廟藏主則九室南向前殿祫享則太祖南

向成祖西向北上

七宗東西相向蓋雖左右分別無

昭穆之名而昭穆之倫世次固未少也及孝烈升祔本

與武宗同一世則仁廟尚在三昭三穆之中而遽議

奉祧故穆廟升祔又祧宣宗於是今日太廟中三昭

三穆代数始不足矣禮曰三昭三穆與太祖之廟而七章

玄成鄭康成則謂周以后稷為太廟文武二廟百世不遷

其下高曾祖禰親盡而毀則文武不遷之廟在三昭三穆
中此七廟之制也劉歆王肅則以高曾祖禰並五世六世
無服之祖為三昭三穆與太祖而七文武世室百世不遷
不在三昭三穆中此九廟之制也今九廟分建成祖為
世室不在昭穆之列而同堂時裕又成祖北上出於
七宗亦不在昭穆之列則仁宣以下猶當有三昭三穆
也而遽祗仁宣於是英宗一世憲宗一世孝睿
二廟一世武世二廟一世穆廟一世是昭穆之數五
也與太祖而六矣豈七世觀德之義哉禮曰父子異昭

穆兄弟昭穆同是昭穆之叙所以別父子非以傳位為世
也請言其義古人之制廟皆南向至皆東向及其祫於太
廟則惟太祖之主東向自如而為最尊之位群昭之入皆
列北牖下而南向群穆之入皆列南牖下而北向蓋群廟
之列左為昭右為穆即今太廟南向之位大祫北為昭南
為穆即今成祖與七宗東西相向之位也故文王稱穆
考則魯衛毛昫皆曰文之昭武王稱昭考則邠晉應韓皆
曰武之穆是昭穆者父子之名也非以傳位為世也如以
傳位為世則兄或為昭弟或為穆子孫何以別焉故曰祖

有功宗有德百世不遷之廟也父為昭子為穆萬世不刊之典也兩漢以來宗廟之制固不相沿然皆以同堂異室為主其昭穆之序固不必盡如周禮而其世數祧遷則皆用昭穆之法未有以兄弟相傳分為二世者也晉武帝追尊七廟則景皇文皇兄弟同為一世故當武帝之時六代而七室其後惠懷愍元兄弟四主同為一世故當成帝之時七代而十一室此不以兄弟為世也唐中宗睿宗同為一世故開元之時八世而九室敬宗文宗武宗同為一世故開成之後九世而十室此不以兄弟為世也宋太祖太

宗同位異坐故當徽宗時九世而十室其後哲宗徽宗又同為一世欽宗高宗又同為一世故當寧宗時九世而十一室此不以兄弟為世也蓋同堂分廟制不必同而父昭子穆則一定之序未有以兄弟相傳即為二世者也今二祖外廟雖七室其實五世揆之七廟之制世數不足而况云九乎然祧遷之失始於祧仁廟而改正之舉在於復宣廟何也在隆慶時仁宗不當祧在今日則仁宗當祧而宣宗不當祧以其在三昭三穆之內也孝之於睿武之於世二廟可也以當二世非也以其

昭穆同也。然則何如而可曰姑以宣廟未祫設為次序。明之寢殿藏主九室南向則太祖居中成祖以下一代各居一室。孝睿二廟同室異坐武世二廟同室異坐前殿祫享則太祖南向成祖西向北上不在昭穆之列。宣宗西向為昭英宗東向為穆憲宗西向為昭孝睿二廟東向為穆武世二廟西向為昭穆廟東向為穆如此則祖功宗德之祀既有託而可久而父昭子穆之序亦有條而不紊矣。

禮科都給事中陸樹德言江南白糧民運未便宜令運軍順

帶部覆從之
乙丑初定二州大雨雹傷禾菽斃三人
夜月犯軒轅星

丙寅定日講官

改解各撫按贖錢於各塞從巡按陝西御史暴孟奇之言著為令

雲南撫按先後劾黔國公沐朝弼罪狀請正法蓋兵科亦言之章下兵部

丁卯東宮講讀官直日講馬自強陶大臨陳經邦何洛文沈

鯉丁士美侍書官馮繼文徐繼申

前兵部右侍郎冀鍊為南京兵部右侍郎

復揚州通判駐儀真專理淮南鹽務

兩廣總督殷正茂報盜掠感恩縣

工科給事中張道明陳理道三要敬天法祖勤民大略謂臣

工南郊多媒慢百司法守多違背有司奉行詔書鮮實惠亦

未得所為要也

戊辰前吏部主事許孚遠降兩淮運司判官

南京察處吏部主事蔡忠等三十一人

刑科左給事中宗弘暹劾前吏部左侍郎魏學曾貪賄徇私

命調南京

遷 考懿莊皇后梓宮祔葬昭陵

工部請織造太監趙玠刻期回京從之玠時請織竣起解也

丙子令有司蠲逋限報三月

戶部尚書王國光上言戶部金穀之司尤極冗瑣近來徵派

愈煩奸偽愈濫致冊籍愈密但經條議其事一人言之置一

冊矣後有言之復一冊焉今年言之置一冊矣越數年言之

又一冊焉其實大同小異殊不知有三費焉各處造寫之費

道路搬送之費交納需索之費取之多方遠幾萬里束之高閣曾未一目今閣臣題造格眼文簿稽查完欠簡要可守餘歸併裁省 上從之凡歸併文冊二十二所裁省文冊二十八迄今便之

丁丑朝鮮國王李昖入賀萬壽節以大喪遣之

庚辰大學士張四維予告

巡按廣東御史楊一桂言廣東之弊莫不善於招安莫善於城守如瓊州文昌樂會感恩會同原未有城惠之永安長寧潮之普寧澄海雖設縣皆有名無實 陛下豈惜此小費置生

靈於塗炭耶 上是之

密雲右營總兵董一元劾免

江北清軍御史蘓民望憂去仍以巡按御史攝之

南京右僉都御史張鹵巡撫浙江

大理寺右少卿宋良佐予告

河南左布政使陶承學為太僕寺卿浙江按察副使陳耀文為陝西行太僕寺卿

祭故右春坊右贊善陳棟以 先帝講官又侍班也

癸未神樞營左副將傅津克總兵官鎮守保定

漕運總兵保定侯梁繼璠南京掌前府事南寧伯毛國器各
劾罷

魏國公徐邦瑞回南京終養

是月釋重囚百十二人

九甲申朔戶部右侍郎傅頤為南京右都御史太僕寺少卿董

堯封為右僉都御史提督操江兼管巡江

乙酉初州定州雨雹傷稼

勅蒞遠總督劉應節嚴邊備以東與土蠻合謀也

丙戌祀宣宗章皇帝神主

乙未東夷王杲阿章等犯撫順寧前錦義

已亥太僕寺少卿李幼滋為大理寺右少卿山西布政司右

叅議屠義英為太僕寺少卿

乙巳大學士張居正請修穆宗實錄略曰世宗實錄開

館六年未成蓋草創脩飾討論潤色其功不斷乃克成書而

職任又在副總裁吏部右侍郎諸大綬禮部右侍郎王希烈

原世宗實錄副總裁今宜責二臣專任申時行王錫爵則

專穆宗實錄仍限每月纂脩官編一年送副總裁月終副

總裁改送臣等刪潤各纂脩官不得營差圖私書成叙錄計

勞多寡不計年月久近此雖纂脩一事而綜覈名實之道實寓於斯上從之

丁未穆宗莊皇帝孝懿莊皇后祔太廟是日司禮太監馮保等俱祭服從事舊制祭服闈人不與也隆慶中遣祭中霤井竈等神私製祭服遂移之郊廟矣

己酉勅諭南京守備兵部都察院等官

庚戌上始御皇極門視事

勞遠東吏卒萬金賞其功

土蠻萬餘騎犯中後所叅將楊燮游擊李惟一禦之賊

奔尋攻沙河驛總兵李成梁馳至乃引去

廣東烏艘船兵作亂以將官隱鈎也

辛亥勅脩穆宗莊皇帝實錄

壬子吉千餘騎屬夷王果五千餘騎近撫順關分守東寧道李鷄

開原兵備王之擲遣官私盟事聞各奪俸三月

江油知縣趙佐侵帑二千餘金論死

壬子協理京營兵部左侍郎兼右僉都御史王遴兵部右侍

郎吳百朋汪道昆闕視邊務遴延綏寧夏甘肅固原百朋宣

府大同山西道昆薊鎮遠東保定百朋等兼右僉都御史左

侍郎石茂華暫管營務

錄故大學士蔣冕孫務樵為中書舍人

禮部右侍郎兼翰林院侍讀學士掌院陶大臨回部

巡撫南贛汀韶右副都御史李棠為南京兵部右侍郎

皇妹第七公主薨追封棖霞公主

前雲南道御史詹仰庇為廣東布政司右叅議

癸丑河南陝西按察僉事夏易范受衆貪虐削籍

十朔寅朔御皇極門頒曆

太常寺卿兼翰林院侍讀學士丁士美掌翰林院事

庚午慈慶宮厠罩火

辛未夜大風

應天府尹朱綱為右副都御史巡撫河南

工部尚書朱衡言茶城以北當防黃河之決而入茶城以南

當防黃河之決而出故自茶城至邳州宿遷高築兩隄宿遷

至清河盡塞決口蓋黃水之出則正河必淤昨歲徐邳之患

是也自茶城秦溝口至豐沛曹單以接縷水舊隄蓋防黃水

之入則正河必淤往年曹沛之患是也二處告竣沛縣壘子

頭至秦溝口應築隄七十里下河臣萬恭總理其事

癸酉勅成國公朱希忠監脩皇考實錄大學士張居正呂調陽總裁

太僕寺卿陶承學為應天府尹

授俺荅兄子永邵卜大成都督同知

乙亥廣東左布政使方弘靜為太僕寺卿

丙子隨州知州周行墨甚削籍下臺訊

上因諭吏部奏報

貪吏毋諉縱

兵部武選司主事

言邊備興革七要寬增稅以卹邊氓

酌清勾以杜繁擾罷遠兵以練軍實處降胡以戒不虞裁冗

并以裕軍需慎簡用以求良將撫群黎以固邦本部多覆行

之

丁丑廣西道御史胡濬以星變乞釋放宮人有云唐高不君

則天為虐幾危社稷此不足為 皇上言然往古覆轍亦當

為鑒 上覽之怒

戊寅 上御文華殿問胡濬所指為誰張居正言其心無他

濬引罪竟削籍

寧夏總兵官謝朝恩免

免淮安東西所班軍京操分哨海上

己卯始開榆河自鞏華城達於通州轉運四萬石給長陵衛
官軍初支京糧若之總督楊兆議改也

戶部尚書王國光請增山西雲南貴州司員外郎主事各一
辛巳分守延綏右副總兵張傑充總兵官都督鎮守寧

夏
土蠻五六百騎窺舊連陽北河近塞二十里總兵李成梁自
赴寧遠堡拒之夜襲斬二十餘級

甲申李成梁夜襲「敗之斬二十餘級

十一月癸未朔巡按陝西御史蕭廩奏勘七苑牧地共五萬五千

三百二十二頃除見牧馬八千七百七十匹給地一萬二千

二百五十一頃外餘共徵銀萬八千二百二十金往例每三

年巡茶御史同總督撫按查覈報可

甲申增貴州壩陽守備官摘兵三百人戍之

巡按陝西御史蕭廩奏薦邊將言守備呼拜允當永為西

夏之用

丙戌刑科都給事中烏昇以脩省請停屠沽上燕會勸召對

宥狂直報聞

丁亥監利知縣李克敬為湖廣按察司僉事以勦寇功

甲午貴州巡撫右僉都御史蔡文薦養病僉都御史孫應鰲
劉秉仁

河工成勞尚書朱衡侍郎萬恭等金幣有差
延綏寧夏邊牆成

丁酉唐府奉國將軍宙杆有罪廢為庶人

戊戌望夜月食陰雲不見

己亥賑山西旱災

庚子兵科都給事中李己以勸惠州盜藍一清等言三事輯
軍士禁殺降知險阮章下兵部

辛丑蠲昌平州寄養馬匹以奉山陵如泗州例

量撤延寧固原邊戍仍酌衝緩分調本鎮標兵貼守

壬寅補給延綏入衛馬六百六十二匹著為令各營馬到鎮斃

二百匹以上者不准補

議征惠州盜藍一清賴元爵等分六哨長樂海豐揭陽歸善

永安進兵又中軍則總兵官張元勳

丙午沐朝弼逮至論死張居正請宥之謂始祖三世皆有大

功命下南京為氓

丁未太僕寺卿方弘靜為右副都御史巡撫浙江

戊申延綏寧夏互市竣晉總督戴才兵部尚書賜金幣各文武有差

兵科給事中李熙言海防六事慎把總之選專水寨之守精海兵之選復烟墩之舊堅久任之法重剋減之禁工善之已酉南京太僕寺卿羅良為太僕寺卿

河道侍郎萬恭奏管隄按察副使章時鸞築南隄自蘭陽縣趙皮寨至虞城縣凌冢莊修二百二十九里有奇

日講官馬自強憂去

內承運庫太監崔敏請買金珠寶石張居正謂前六月間奉

旨停止今忽有此舉則前詔不信乞暫停之少甦民力因封

還敏跡遂報罷

定議漕舟徑抵土石二壩先年舟泊張家灣易舟轉剝日不

過三萬石隆慶五年五月因河溢令徑抵壩

十 仁癸丑朔命順天尹祈雪

兩廣總督殷正茂以征惠州盜乞兵三萬募浙兵八千餘募土兵報可

南京鴻臚寺卿史朝賓卒賜祭

甲寅故思南知府李允簡文娘入國子監從允簡子通判祝

之請

乙卯殷正茂請授莫茂洽安南都統使下禮部

丁巳翰林編脩許國補日講官

旌順孫成都楊茂勛善事祖母高氏

平江伯陳王謨充總兵官鎮守湖廣

戊午上視朝群臣不至者百七十三人各奪俸三月

提督京城巡捕署都督僉事張時春為南京前軍都督府僉

書

己未鞏昌地震岷州尤甚聲如雷壞城舍人畜亡筭陳學家

震成穴水赤

庚申令陝西苑馬寺卿兼布政司參議分守平涼行太僕

寺卿仍兼僉事分巡平涼其少卿仍兼僉事各分地總收巡

按蕭廩議上

岷府奉國將軍定燭有罪廢為庶人弟定煖定斌奪祿三之

分

辛酉蠲榆林延綏屯租仍賑之

壬戌寧夏巡邊營千總守備呼拜為游擊將軍巡撫朱笈薦

之也

癸亥許雲南總兵官黔國公沐昌祚仍任

甘州都司王朝以番賊射死命進一級世襲

錦衣衛左都督朱希孝廕百戶百戶馮邦柱馮保姪為指揮同知以緝獲功

丙寅賜武清伯李偉肩輿朝參

丁卯蘓松叅將尹鳳為署都督僉事提督京城巡捕狼山副

總兵吳國為署都督僉事鎮守貴州兼提督清平等衛

遣俺荅舊使火力赤奴謀赤北還嘉靖間來使六人以内犯下獄二十二年餘物故至是釋之

甲戌張居正請明年正月上旬即開講又先帝喪服未暮

勿設宴并免元夕燈火工曰燈已預停每侍聖母膳甚

簡素或節日具少菓宴不設樂居正稱善尋諭光祿寺節間

酒飯卓免之省七百餘金

吏部文選郎中胡執禮為通政司右通政提督騰黃

候選訓導侯貴言學校六事曰議廟像孔子像今撤存不一

曰議從祀請侑戴聖劉向王弼賈逵何休王肅荀况何宴馬

融杜預楊雄吳澄又別祀倉頡史籀程邈李斯蔡邕李陽冰

蔡倫曰定學制曰刑定春秋三傳及禮記不報曰冠帶廣恩

曰葦科貢牌坊路費不報

初令甘肅行太僕寺卿祁天叙兼陝西按察僉事總理屯田
鄉兵增臨沘帶銜同知專理甘州等九衛鞏昌府同知專理
涼永等六衛并各監督通判俱聽寺臣委用

丁丑巡撫延綏右僉都御史邵光先改陝西

播州宣慰司舍人楊應龍嗣宣慰使仍不世襲

兵科左給事中蔡汝賢請祀宋儒羅從彦李侗於孔廟章下
所司

戊寅張居正言制勅尚簡嚴莊重成化間誥勅叙本身履歷

功績不過百餘字餘不過六七十字至慶典覃恩其詞尤簡
蓋恩賚為榮不必計其履歷此制體也近來過為誇侈多至
數百千言虛為頌美臣諛其君猶謂之佞况以上諛下乎乞
戒撰人復古崇實毋壞制體從之

吏部右侍郎兼翰林院侍讀學士諸大綬予告

庚辰陝西左布政使馮舜漁為右副都御史巡撫延綏贊理
軍務

兵部議仍遣御史三人清軍

是年隴川宣慰司目把岳鳳弒其主多士寧走緬甸

癸酉萬曆元年

正月午朔 工御朝不賀

丙戌戶科都給事中賈三近劾湖廣總兵平江伯陳王謨總漕時損糧五百萬論斥不可復用兵科都給事中李己亦論之遂罷王謨

戊子 上就講文華殿

陶臣進玉牒式

李鶴特授都督同知不為例故德平伯李銘子

丁酉陝西妖逆齊芳劉汝清伏誅

己亥南京禮部尚書秦鳴雷論罷

庚子 上出朝執男子王大臣於宮門王大臣一日章龍請

江人嘗授總兵戚繼光三屯營兵不遂流落都下以巧捷便

佞亡須髯入中貴冢為所昵遂竊中貴裝闌入乾清宮門外

值駕出色戰以犯蹕執驗之男子也袖有佩刀馮保立鞠之

曰南兵王大臣奚自曰自戚總兵保密報張居正居正謂戚

氏乃握南北軍地在危疑且禁毋妄指此可借以除高拱也

保故甘心陳太監洪先下洪獄令大臣供之自是合稱高使

改籍曰武進縣即令家奴辛儒衣大臣蟒袴予三劍、首飾
猶睛異寶送繫厥中入以聞請詰主使者癸卯居正跡亦如
之工即付保鞠保令辛儒屏語大臣曰第言高閣老怨望
使汝來刺願先首免罪即官汝錦衣賞千金不然重榜掠死
矣因使儒昇大臣金美飲食之即令誣拱家奴同謀獄具保
遣五校械拱奴而居正前跡傳中外中外藉、謂且逮拱居
正乃密謀吏部尚書楊博、曰事大迫之恐起大獄高公雖
粗暴天日在上萬不為也居正色不懾會大理少卿李幼滋
以居正鄉人私語居正果行之污及萬世矣強荅曰吾憂之

甚何謂我為居正禁科道不得有言而御史鍾繼英跡暗指
之居正怒擬指詰問左都御史葛守禮拉楊博過居正居正
曰東廠獄具矣同謀人至即跡處之守禮曰守禮敢附亂臣
黨耶願以百口保高公居正默不應楊博力為解居正仍如
故守禮因歷教先時如貴溪分宜華亭新鄭通相傾軋相名
坐損可鑒也居正憤曰二公意我甘心高公耶奮入內取東
廠揭帖示博曰是何與我而揭中居正手定四字歷、有據
而居正忘之守禮識居正筆笑而袖之居正覺曰彼法理不
請我為易數字耳守禮曰此事密不即上聞先政府耶吾兩

人非謂公甘心新鄭以回天非公不能居正悟揖謝曰苟可
效敢不任第後局何以結博曰公愚不任耳何任難任須世
臣乃可共居正因奏上命馮保與葛守禮都督朱希孝會
訊希孝懼而泣急謁居正居正命見冢宰遂謁博曰欲借
公全朝廷宰相體耳何必陷公因示以指希孝如其言使校
尉密詢大臣何自來則來自保所語盡出保口校尉語大臣
入宮謀逆者法族奈何甘此若吐實或免罪大臣茫然笑曰
始給我主使者論死自首亡恙官且賞豈知此當實言適高
氏奴逮至希孝雜諸校令物色大臣不辨也及會訊風霾大

晦尋雨雹不止東廠理刑白一清謂保初問官二千戶曰天
意若此可不畏乎高公顧命大臣強我輩誣之異日能免誅
夷耶皆曰馮公已具稟而張閣老手覆四字一清曰東廠機
密重情安得送閣改乎頃之天稍明出訊大臣故事先雜治
大臣呼曰故許我富貴何雜治也馮保即問誰主使者大臣
仰視曰爾使我乃問也保氣奪強再問爾言高閣老何也曰
汝教我則豈識高閣老希孝復詰其蟒袴刀劍曰馮冢奴
幸儒所予保益懼希孝曰爾欲污獄吏耶遂罷保外飲大臣
生添酒瘖之而內以拱事上聞有閣殿某年七十在上前

言高公不可枉太監張宏亦如之於是上下刑部擬罪竟
論大臣斬

談遷曰江陵脩怨令新鄭放逐足矣必借王大臣之獄果
正其罪九族為輕噫宰相坐廢或不無怨望聞見一二若
懷奸蹈險犯天下之大不韙如專聶之事於右未聞也而
謂新鄭甘之乎江陵深機祇自見其愚耳權保本閣人求
快一時曾何足論江陵號察相不與汶等械軍粹發中
不自制歿罹讒構闔室繫繫天且以枉高氏者枉張氏也
壬寅巡撫保定右僉都御史宋纁予告

吏科給事中湯聘尹言五事堅趨向敦朴素慎舉動重爵祿

明職掌報聞

嚴皇城門禁

癸卯兵科右給事中張楚城論總督王崇古誥命不宜泥金
書奪命燬改給

巡撫右副都御史殷從儉為副都御史回院

增韶州府同知駐三華鎮捕盜增翁源縣丞

甲辰李環嗣豐城侯

乙巳免通江縣新增茶課五百八十三金

丙午禮部右侍郎兼翰林院侍讀學士王希烈為吏部左侍郎仍掌詹事府事

順天府丞劉堯誨大理寺右寺丞孫在揚為右僉都御史巡撫保定

丁未光化縣治避水移北集街

戊申兵科都給事中李巳為順天府丞

故工部尚書宋禮贈太子太保

安南夷舍莫茂洽為安南都統使

己酉工部尚書張居正奏王大臣妄攀王者厥衛連日

推求未得宜稍緩其獄蓋人情急則閉匿愈深久而急弛真情自露若推求太急誣及善類有傷天地之和 上然之

己酉復前刑部員外郎部經邦原官經邦嘉靖初建言大禮

辛亥王學詩嗣請遠伯

罷陝西左布政使馮舜漁時巡按蕭廩薦之擬擢巡撫延綏而巡按陳文煥又劾其貪故吏部謂勘明方服也

是月減各省重囚四十八人

東 黑石炭連把亥等自紅羅山犯遼陽

廣西官兵平府江程賊斬四千六百六十七級俘四百四十

八人

郭應聘曰府江蓋百粵之孔道也諸徭占據為梗吏民商
旅視為畏途即縉紳亦橫被慘酷天威震疊一旦廓清足
以快神人懾遐邇矣顧尤有慮者蜂螳之群不可數也梟
獍之性不可馴也此患在外者也土司利田之廣而成額
多虧哨堡玩愒之微而兵防易懈撫安之官目耽保之排
年又從而漁獵之其端雖細而禍機伏焉此患在內者也
內患除則外患弭矣監司勤經略而詰久逋之奸守將勤
巡緝而杜未萌之釁地方尚亦有賴哉

二 丑子朔慶府弘農王萬禰周府會稽王勤浚薨

左副都御史劉斯潔罷

起尹壘仍南京禮部尚書

勒襄城伯李應臣閑住

癸丑 上始御經筵眷諸臣金幣有差

甲寅遣祭歷代帝王陵寢

丙辰命大學士呂調陽祭先師

巡撫江西右副都御史徐棡為南京工部右侍郎

賜故吏部右侍郎諸大綬刑部右侍郎游居敬祭墓

戊午 上祭太社太稷

壬戌南京守備中軍都督府僉事懷寧侯孫世忠充總兵官
鎮守湖廣

甲子鑄皇城巡視科道關防

城監利縣

許播州宣慰使楊應龍統撫夷民

丙寅故吏部右侍郎兼翰林院侍讀學士諸大綬贈禮部尚
書

丁卯禮部右侍郎署國子祭酒汪鏜為左侍郎回部仍直經

筵太常寺卿兼翰林侍讀學士丁士美為禮部右侍郎兼日

講教習庶吉士

蠲宣府屯糧十之二

閱視侍郎吳百朋請脩宣大邊墻從之

戊辰嚴宗室越關奏擾之禁

陝西布政司右叅政張守中為右副都御史巡撫延綏

裁陝西苑馬寺長樂靈武二監錄事

己巳雲南道御史鍾繼英言王大臣事奉行過嚴人心惶惑

臣輒有安集之請或大臣知罪不可逃駕詞羅織臣輒有原

恤之請奪俸半年

壬申南京國子祭酒林士章為國子祭酒

刑科給事中維遵雲南道御史景嵩韓必顯各降浙江陝西
湖廣布政司照磨以劾兵部尚書譚綸陪祀咳嗽也綸奪月
俸

癸酉誅王大臣

甲戌左春坊左諭德兼翰林院侍講申時行為左庶子

代府富川王廷培薨謚恭簡

設江西花園洞巡檢司

丙子禮部左侍郎署南京禮部右侍郎事萬士和署南京國

子祭酒

臨淮侯李庭竹守備南京管中府事

戊寅罷大同總兵官左都督馬芳

庚辰南京工部右侍郎董傳策改南京禮部右侍郎

三朔午庶吉士林景暘為禮科給事中

山西總兵官都督僉事郭琥為將軍總兵官鎮守大同

仍給各將養廉田勿苛摘

時有逆卒勾一窺老營堡幾陷琥知之有備急引去恰台吉

脩怨於殺胡堡守備擁衆壓境琥勒兵諭以得失乃退重脩
大邊自陽和至丫角山亘六百餘里繕城修倉有備邊功
癸未詔增供用庫黃蠟歲二萬五千斤白蠟三萬五千八百
十六斤

甲申暹羅國王華招宋入貢云舊印為東牛國破毀乞補給
下禮部

鑄科_臣巡視光祿寺關防

脩宣府北路邊牆

乙酉巡撫江西右副都御史徐棡為南京兵部右侍郎

戊戌太僕寺少卿屠羲英為鴻臚寺卿

前山西按察使王世貞起補湖廣

昌平兵備僉事張廷弼濬鞏華城外河

己亥蠲大同屯租仍賑之

頒順義王俺荅番經

庚子福建布政司右叅政宋儀望為太僕寺少卿

漕運都御史王宗沐報漕米三百十萬一千五百石一斗並

渡淮

故巡撫湖廣右副都御史徐南金阮文中各予祭葬

辛丑除高淳縣下田淹租八百六十餘石
聽民徙居葦華城

癸卯贈光祿寺少卿沈鍊子襄廕入國子監

四庚戌朔上享太廟

辛亥詔褒魯王頤坦新樂王載璽奉國將軍健根鎮國中尉
觀爇賢孝文行

旌黎山王府輔國將軍定烟孝行

再鑄欽天監曆日印

靖江王府奉國中尉經榆殺姪邦蓐賜死

壬子武清伯李偉乞脩屋價給四千金不為例部科沮之不

聽

癸丑故巡撫湖廣右副都御史阮文中贈兵部左侍郎廕子

入監

故南京兵部尚書李遂謚襄毅

甲寅京師大風夜叙州府地震

乙卯總理河道兵部左侍郎萬恭子允位廕入國子監

增薊鎮昌平敵臺二百增山西樓子營守備一唐冢會操守

官一河曲縣羅圈堡各防守官一

通山王府奉國將軍 有罪廢為庶人

丙辰設山東海運哨舡海道凡三哨各舟二十經二千餘里

順義王俺答請印從之給鍍金銀印

丁巳詔增兵進勦廣西懷遠猺賊先是總督殷正茂巡撫郭

應聘總兵楊 李錫以二萬人進會大雨雪無聞志議秋再

征

戊午許四川布政司左叅議胡汝嘉終養

甲子前巡撫鳳陽右副都御史陳炯為左都御史巡撫山西

兵部左侍郎趙孔昭協理京營戎政

乙丑勤炸嗣河陰王

潮惠賊平俘斬萬二千二百餘人擒渠賊藍一清等六十一

人晉殷正茂右都御史詹錦衣衛副千戶總兵張元勳晉署

都督同知詹本衛百戶

丙寅土蠻犯鉄崩鎮西等堡李成梁擊斬五十七級獲馬二

百餘匹

戊辰勘寧夏鎮地

庚午巡撫寧夏右僉都御史朱笈加右副都御史

上禱雨宮中明日雨

辛未厚光嗣廬江王珣鐸嗣海寧王

壬申宣府總兵官趙奇論罷

丙子復曲阜孔氏世職知縣

丁丑延綏總兵官都督同知雷龍為鎮朔將軍鎮守宣府

戊寅封淮府珣鏡榮昌王崇府常澧泰和王常澶洛川王多

熾建安王

己卯吏部文選郎中王篆為太常寺少卿提督四夷館

南京後府僉書都督僉書胡宗舜疾去

五庚辰朔神樞營右樞將程九思為

將軍都督

總兵

官鎮守延綏

四川官兵攻都掌蠻克凌霄城六月克都都寨

辛巳工御經筵論春講二月十二日至五月二日免秋講

八月十二日至十月二日免永為例不必一一題請

久旱遣禱山川社稷

復歸黑沙洲柴課於南工部

京師雨雹

布政司叅議謝廷藩加太僕寺少卿

復故左都御史王廷原官

甲申令兩京內外官於慎刑獄

丁亥代王廷琦薨謚恭王

戊子庶吉士黃洪憲劉虞夔吳中行盛訥王懋德公冢臣劉元霖趙鵬程為編脩王祖孺劉克正張應元劉楚先為檢討李盛春趙參魯右應岳蕭崇業秦耀為給事中漆彬趙耀孫成名宋范何汝成為監察御史

己丑議討四川都掌蠻召前總兵官郭成安大朝

庚寅四川巫山縣設巴中驛

癸巳令提督兩廣侍郎殷正茂勦海盜林道乾

乙未工科給事中梁式上言重人才恤內地其重人才曰慎起用省繁文崇寬大其恤內地曰軫民瘼正人心脩武備上從之

開廣西府江水陸諸路復四土巡檢司尋改昭平都司為叅將

戊戌禮部左侍郎兼翰林院侍讀學士汪鏜充世宗實錄副總裁

浙江道御史謝廷傑請王守仁從祀章下禮部
庚子禮部請儒臣會議王守仁從祀

致仕翰林院編脩曹大成被劾削籍

辛丑山東左布政使施篤臣為順天府尹

壬寅發帑金三十七萬雜買各邊糧草備明歲

癸卯增雲南解額五人

六月酉朔在鈔嗣瑞淦王

辛亥吏部起尚書劉采等九十三人 上命慎之母濫

鑄蘓松常鎮糧道關防

壬子故總督楊選子壽甫乞復其父官優卹不許

丙辰增紫荊等邊敵臺

戊午馬蘭谷叅將楊烈為南京後府僉書

壬戌故刑部尚書顧璘子峻庵入國子監

戶科都給事中賈三近以海運十二萬石至即墨縣福島遭

風壞七艘失米殆五千石溺十五人乞暫停海運時巡倉御

史鮑希顏山東撫按傅希擊俞一貫俱如之報可

甲子賜張居正樓曰捧日堂曰純忠俱藏宸翰也特賜費千

金

丙寅改鑄蘓松兵備浙江水利二道關防俱兼管河道

錦衣衛請造鹵簿大駕命俟三年

丁卯前撫治鄆陽右僉都御史孫應鰲起前秩

庚午總督薊遼保定兵部右侍郎兼右僉都御史劉應節為
右都御史仍兼兵部右侍郎總督

壬申賑淮安水災米九萬石折明年田租

丙子國子司業范應期韓林脩撰陳經邦為左春坊左中允
脩撰何洛文為右春坊右中允俱兼編脩沈鯉為左贊善許
國陳思育為右贊善俱兼檢討

張居正請稽查章奏隨事考成凡部院遇各章奏或奉旨或
欽依轉行各衙門俱先酌道之近遠事之急緩定期署簿每

月終注銷其轉行覆勘提問議處催督查覈等項另造二冊
各註略節及原限一送科注銷一送內閣查考各撫按奉行
事理有遲延者該部院舉之各部院注銷冊有隱蔽者該科
舉之六科繳奏有隱蔽者臣等舉之如此月有考歲有稽不
惟使聲必中實事可責成而參驗經覈之法嚴即建言立法
者亦將慮其終之固效而不敢不慎其始矣從之

談遷曰江陵立考成法以為制治之本向者因循玩愒至
是始中外淬礪莫敢有偷心焉要詳兼舉張弛共貫宰相
一身周沛天下不過如此遂無遁情矣諸葛亮罰自二十

以上必親覽劉宴事凡巨細必日中決之亦其意也當時
銜江陵者苦其束濕輒言清淨之理嗚呼處尊優之地不
患不樹望患不習事孔子所稱人道敏政政而敏也詎可
以悠、汶、同論乎哉

戊寅復移山西也田僉事於應州

裁淮安鳳陽揚徐遼運所十有一

七己卯朔封德王世孫常清

兵部尚書譚綸劾車駕主事熊敦朴狂悖怠玩謫兩浙鹽運
司判官初庶吉士宋儒得禮部精膳主事敦朴得兵部敦朴
不能平意快、儒險詐畫籍其言思中之會有蜚語云敦朴
欲論太宰張居正以問儒荅曰彼不獨論太宰且欲論相公
於是綸叅敦朴謫外或言敦朴枉召兩人面折則畫儒為之
也

初立商丘縣儒學先附府學也

發帑金八千於薊鎮備撫夷之用

壬午禮部覆河南建德等十三府惟一府鈐束不便宜如弋
陽王府各自管理其絕宗悉附親支以遂昌景寧附陽城新
昌慶雲附嘉定其太和陽夏德平營陽懷慶威平延津孟津

上蔡太康聽自理從之

癸未左春坊左中允兼翰林院編修范應期何洛文主試順

八月
修李自華為國子司業

丁酉科給事中陳吾德叅禮部精膳主事宋儒擅誘聖政
偽嘆大臣誣斥熊敦朴李熙亦劾之謫山西按察司經歷

戊子南京福建道御史石楨言王守仁不當崇祀章下禮部

設湖廣黃堡驛裁霞派新關二驛

庚寅暑讞釋輕繫三百五十一人

癸巳詔司屬差滿違限及陞調遷延久不赴部者叅治

丁酉賜華陽王承燾書院曰樂善

詔祀吳與弼陳獻章胡居仁及元儒吳澄於各鄉社

戊戌巡撫大同右僉都御史劉應箕劾罷

設青浦縣於唐行鎮

壬寅戶科給事中趙參魯上言從祀王守仁孔廟下禮部

癸卯山西布政司右叅政申佐為右僉都御史巡撫大同贊

理軍務

甲辰增大同車營游擊兼巡撫標下中軍

丁未故四川總兵官劉顯戴罪勒都掌蠻張居正與總督
魯省吾書曰夫將必劉顯而郭成其次也顯束髮與蠻戰著
名蠻人言顯輒震懼而成父被賊殺仇不共天而勇故可用
命陝西巡撫右僉都御史却光先勦回賊
荆州承天大水
是月沔池徐州河溢

俺答請於甘涼開市王崇古言套中諸酋移穴中山而令市
寧夏往來千里拂其情矣何以固盟不許

初巡撫寧夏右僉都御史朱笈言寧夏孤懸河外當時定稅
邊一斗二升後缺料缺馬加增地畝草萊賦日益重又河勢
遷徙良田衝沒河嶺沙壅宿水荒蕪田不得耕累經具題未
蒙豁免亦可哀也部覆從之

戊申朔荆州地震丙寅止

庚戌除寧夏虛糧萬二千餘石

壬子兵科給事中蕭崇業上五事崇正學校實政重言路緝
告訐禁侈靡章下所司

癸丑罷海運

右春坊右諭德兼翰林院侍讀王錫爵左春坊左中允兼翰

林院編脩陳經邦主試順天

甲寅叙州府地震

丙辰廣東布政司右參議唐仰庇致仕

丁巳建寧地震

庚申蠲折平陽府旱災屯租有差

辛酉禮科給事中石應岳請祀布衣陳真晟從祀孔廟否亦

專祀於鄉下禮部祀之原籍

濬天津衛新河

壬戌楚府通山王英炊薨謚莊懿

癸亥減江西積穀以地方繁簡貧富為差上等減十之五次

十之六下十之七

乙丑錦衣衛後軍都督同知孫鈺卒贈右都督

己巳夜月犯井宿第一星

庚午兵部右侍郎吳百朋省母工部右侍郎熊汝達養終

壬申南京戶部尚書曹邦輔致仕

癸酉翰林院編脩張位請令詞臣輪直史館注起居從之

命兩廣浙福協勦逋賊林道乾

丁丑尚寶司丞鄭履淳為光祿寺少卿

是月茶城河淤阻漕舟數千艘

九庚辰工部屯田主事耿定向為尚寶司丞

曾子喬孫曾繼祖奏臣祖質粹授翰林院五經博士父吳先
沒臣自誓未襲子承業當襲知縣曾袞謂序嫡冒襲因爭執
吏科給事中李孟春請勅下禮部

延綏東路左副總兵孫國臣為總兵官鎮守陝西協守寧夏

副總兵劉濟為將軍都督總兵官鎮守寧夏

壬午太僕寺少卿宋儀望為大理寺右少卿

癸未廣西右布政使李淑終養

蠲荊州承天濟南災租有差仍賑之免永清縣水災田租之

半

甲申南京右都御史傅頤為南京戶部尚書大理寺卿陳一

松為工部右侍郎河南布政司右叅政楊俊民為太僕寺少

卿

丙戌夜四川官兵克九絲城都掌蠻平斬獲共四千六百十

五人

丁亥總督陝西三邊戴才以兵部尚書署南京右都御史太

僕寺卿李幼滋為大理寺卿

署刑科右給事中侯于趙請今後厥衛獲盜必送法司研審
如罪真方論功毋誣執扶同部覆從之

戊子湖廣按察使王世貞為廣西右布政使

吏部尚書楊博引疾去

設密雲遵化永平武學

己丑福建總兵官都督僉事俞大猷罷以海寇失事也

庚寅兵部左侍郎石茂華為右都御史仍兵部左侍郎總督

陝西三邊軍務

閱視兵部右侍郎王遴回部

壬辰兵科左給事中蔡汝賢劾通政使李際春以福建巡按

劉良弼報海寇事稽延六日方上其失非淺遂調際春南京

薊鎮統領南兵總兵官胡守仁為都督僉事鎮守福建

禮部覆陝西巡按御史陳文煥秦韓府鎮國中尉融烝等奉

國將軍旭樞等至省城索通祿命降為庶人

癸巳協理京營戎政兵部左侍郎趙孔昭回部

甲午錄囚命工部尚書朱衡主獄

乙未禁宗室越境選儀賓及抑勒需索者

丙申總督宣大山山西軍務太子太保兵部尚書兼右副都御

史王崇古協理京營戎政南京吏部右侍郎林瀛為南京工部尚書

丁酉兵科右給事中蔡汝賢言王崇古驟易恐生「心御史周詠亦言之不聽

戶科給事中顏容舒言異時內府缺用鋪戶與內監商人朋奸故餘價未償隱不敢請 皇上方敦朴為天下先不追論

壘斷遺奸幸矣可復容其陳乞耶今後邊商京鋪人等索價祇本衙門陳告毋瀆天聽部覆從之

以「首夏青及青卜言切盡台吉等謀內犯諭邊臣備之

錄因承天門

戊戌罷南京禮部右侍郎董傳策兵部職方郎中張明化明化族兄雲以訟託明化百五十金求申明化賂傳策百金受之已悔下兵馬司詰其由明化謂傳策父受賂我甘與同欺言官因劾之

改察雲武學教授為提調各增科正二員

己亥起前巡撫大同兵部右侍郎兼右僉都御史方逢時為總督宣大山西軍務兼理糧餉

辛丑增遼東廣寧右營游擊

壬寅南京太常寺少卿王好問為通政使南京兵部右侍郎
李棠改南京吏部

癸卯命停刑

蠲江南蘆洲逋課

丙午南京大理寺卿杜拯為南京兵部右侍郎

丁未吏科給事中湯聘尹言章奏三事秉公鑑崇簡切薦語

五句母對
偏母繁詞戒虛名 上從之

工科給事中朱南雍劾河道侍郎萬恭以茶城河阻漕 上

切責恭

太師兼太子太師成國公朱希忠卒希忠字 器宇凝重

嘉靖丙申龔爵纜踰冠歷事三朝代祀南郊三十有九北郊

二十有七主進士恩榮宴凡十善結納名出諸勲上年五十

八

十戊申朔享太廟頒曆

前南京太僕寺卿殷邁為南京太常寺卿

協理京營戎政兵部左侍郎兼右僉都御史趙孔昭致仕

辛亥應天府尹陶承學為南京大理寺卿

密雲鎮本色芻粟改料豈

壬子令翰林院五經博士曾袞回勘

東元魯思罕等三千騎犯遼東寺兒山臺總兵李成梁拒

之斬七級

癸丑巡撫河南右副都御史朱綱致仕

光祿寺卿路王道為應天府尹

甲寅設廠於瓜洲儀真改造江北南京各總淺船

乙卯

工御文華殿張居正進帝鑑圖說至宋仁宗不喜珠

飾上曰賢臣為寶珠玉何益居正曰明君貴五穀而賤珠

玉五穀養人金玉饑不可食寒不可衣書稱不作無益害有

益不貴異物賤用物良以此耳上曰然宮人好粧飾朕歲

賜每節省宮人以為言朕云庫積幾何居正曰皇上言及

此社稷生靈之福上又曰秦始皇銷兵大木挺可傷人何

銷兵為居正曰人君布德脩政固結民心為本天下之患每

出所防之外秦亡於戍卒故天時不如地利地利不如人和

上曰然

汝陽王府革爵廢人勤膳有罪賜死

丙辰南京太常寺少卿汪宗伊為光祿寺卿

英國公張溶充兩朝曾錄監脩官

丁巳太僕寺卿吳道直為右副都御史巡撫河南

錦衣衛左都督朱希忠列英國公張懋例乞贈兄希忠王爵

吏部言其非例生前被寵已足酬勞沒後論功輒難優異

工特許之不為例於是追封定襄王謚莊簡蓋其兄弟素善

馮保及張居正也居正作神道碑云嘗與都督陸炳扈世

宗南巡脫衛輝之厄上獨顧余言希忠事皇祖有扈蹕

功朕今推皇祖意王之不為踰制云

談遷曰令甲非軍功不王至扈蹕督戎皆臣子常職非有

奇功異能也希忠孝謹重厚賓客填門沒被王爵以衛輝

行宮之事當時乘輿倉卒相傳陸炳排闥負之而出上不

自明其後炳乘權受知遇探詠屢起終始無間故人以意

推之猶在疑似今緣以希忠狗聲附影誰為左據者郭勛

欲侑其祖英侑太廟先纂英烈傳云英射陳友諒死之噫

友諒走禁江世宗宿衛輝俱暮夜又事隔久矣各據其

功不為識者宜笑耶

戊午江西布政司左叅政姚弘謨為南京太常寺少卿

己未移陝西苑馬寺少卿兼按察僉事馬文健於靖衛為

整飾靖兵糧道

庚申廣西右布政使王世貞為太僕寺卿

巡撫順天右僉都御史楊珉為右副都御史仍巡撫時考滿吏部擬陞上允之仍令考滿例陞者止叙其由母輒擬定復設陝西省城叅將

巡撫雲南右僉都御史鄒應龍發兵襲姚安鉄鎖箭等夷敗之初夷詐請撫應龍問道入姚安預徵兵約期至二十七日進赤石分三道進兵斬三百餘級降二千餘人事平

辛酉兵部左侍郎王遴疾去

甲子鴻臚寺卿屠羲英調南京太僕寺少卿

乙丑罷增設兵部侍郎

丙寅覈陝西三邊歷年軍餉

戊辰增各署廩事監生百有九人

諭工部覈昭陵之費凡三十九萬九百三十二金木石預馬下令各省直覈解積負節省錢糧

榆林衛署指揮同知張曰敬坐侵百金以上永成邊衛已巳東昌知府羅汝芳為雲南按察副使汝芳好講學

壬申復臨清德州二倉積貯舊額

十月辛巳張居正侍 上文華殿語及宮人張秋菊失火事

上曰此先帝宮人潛邸內人聖母欲答之五十朕曰杖三十下安樂堂矣居正言其罪當上曰然法有可寬亦有不可寬對曰誠如聖諭諸葛亮云宮中府中俱為一體陟罰減否不宜異同正此之謂

科給事中劉不息等論朱希忠不宜贈王御史楊相等亦言之不聽

甲申順天府尹施篤臣議處廂戶言始自永樂初以江南富民三千戶填京師分宛平大興等籍弘治間止二百戶奏免倉解每戶徵五金後因陵祭鄉會武闈仍廂戶備辦今僅存

五戶歲辦甚苦乞每縣歲加二百五金從之止加二百金

工部辦事進士鄒德涵請王守仁從祀孔廟下禮部

丙戌移河南楊莊店巡檢司於因壩倉為固城巡檢司

庚寅兵部奏太僕寺寄牧馬不分南北每匹徵二十四金

辛卯望夜月食既

張居正六年考滿進中極殿大學士詹中書舍人支正一品

俸

于慎行曰人主年少未能專決大政不宜受重爵如漢武帝遺詔封金日磾以昭帝少不受封其後病困大將軍乃

自封之日殫有大臣之風矣今上十齡踐祚未親大政江陵遽逐中州倏忽自貴官至極品何其識不如一亡也授都督同知黃台吉等散官仍賜勅

丁酉兵科右給事中陳吾德以慈寧宮後室火請停朱希忠王爵不聽

建涿州胡良河橋

壬寅光祿寺少卿王緝等言工部器四歲造一千四百件南京工部歲三千六百件今器用完好乞明年量造二千件餘暫停止從之

乙巳環球國中山王世子尚承入貢表求嗣封

是月廣西巡撫右副都御史郭應聘進兵討懷遠縣盜又奏盜平討右田餘孽

前右副都御史雷賀卒賀通城人嘉靖辛丑進士

十仁丁未朔郝維喬張孫繩李邦佐胡汝欽楊節為給事中維喬吏科孫繩戶科邦佐禮科汝欽工科節南京刑科行人趙池劉光國國子博士許三省推官蕭洋黃家棟胡秉性鄭準學錄劉維年張道為試御史維年道南京

戊申諭中外臣工毋引疾辭避從給事中秦耀言也

鄒應龍招鉄鎖箭等夷降二千人事平

瞿九思曰羅思羅勤快自以為孟獲後稱王豈不以為誠
雄哉及大將軍登東山至孟獲墓因破勤快巢令得逃倘
亦有武侯七縱之意乎旋擒矣思等皆不及孟獲遠甚臣
獨嘉鄒司馬提兵六千人入虎穴未嘗不壯其勇及聞賓
川事往來皆饑餓不得食則又未嘗不歎曰古者軍井未
成將不言渴軍竈未炊將不言饑凡為將當如此

已酉戶部尚書王國光言欲裕國儲先覈存留之額乞行各
省直所報歲入歲用冊筭明立限解部舊額若干支用若干
餘剩若干本折色見貯若干虧欠若干與部冊對明臣等會
計專本處各項支用餘銀解京濟邊報可

談遷曰江陵志在富强當積弛之後錢穀陰耗不可問力
振其弊務青實效中外凜、毋敢以虛數支塞行之十年
太倉之積足備數載則宰相不問錢穀真迂儒之言也

庚戌蠲監利黃梅當陽荊門及荊州右衛田租
辛亥巡撫大同右僉都御史劉應箕侵帑被劾削籍

甲寅禮部尚書兼翰林院學士陸樹聲致仕

前光祿寺卿路王道調外尚膳監

王朝用苛索庖人被

劾下法司故論及之
丁巳大風

戊午四川左布政使羅瑤為右副都御史巡撫貴州兼督湖
北川東

己未發帑金三萬賑遼東寧前廣寧錦義軍士

盜劫豐城縣庫

庚申廣西左布政使楊成為應天府尹

甲子禮部左侍郎署國子祭酒萬士和為禮部尚書

乙丑張居正編今年講章大學一帙虞書一帙通鑑四帙進

覽

丁卯南京太常寺少卿姚弘謨為南京國子祭酒

兵部奏行查未結事件立限奏報仍置青冊送閣科按候註

銷於是各部院率凜效之

陝西巡撫部光先言巡按蔡廷陳引疾報曰近來巡按往

稱疾避事吏部其訪實方覆如推諉并巡撫官叅處

己巳混酋補貢馬百匹

乙亥潮州副總兵李誠立失事免

是年前南京兵部尚書劉采卒采字

麻城人嘉靖己丑

進士知宿州以威惠著進戶部員外郎歷郎中擢四川參議
五載遷廣西按察副使雲南左叅政廣東按察使廣東左右
布政擢右副都御史巡撫山東除寇罷採鑛民甚德之三載
進南京兵部右侍郎入改戶部又改南兵部引去除慶初起
工部尚書未任改吏部至今官生平不為巧捷贈太子少保
謚端簡予祭葬

馮時可曰今所稱才豈盡衡度參伍哉其細者脂韋媿媿
務中人權以苟自容而巨者浮慕感慨之節矯然樹願
顏信眉扼腕欲以奇釣二者偽才也一過利害避矣即累

千古緩急何濟若公者非真才不能方公不行錢信州斯
念也富貴得失足動之哉處天下事雷擊斧斷耳爾嗚呼
公落、下吏時其干鈞之矢不發乎及大吏則飲羽右梁
也微華亭公終落、矣古人致泣於良璞有以矣

甲戌萬曆二年

正月丑朔 上御奉天殿受中外朝賀

己卯前南京戶部尚書鮑道明卒

壬午享太廟

兵部叙款貢功加王崇古少保詹子入國子監吳光右副都

御史賜金幣

癸未改居庸關通判仍管昌平鎮糧餉

甲申洛容縣盜夜殺典史謝漳

戊子大同總兵官郭琥以失符驗降一秩

張居正請引見廉能官下禮部倣 祖宗時午朝之儀定簡

便儀注上之

許應天府治中同知兼筦江防

庚寅協守薊鎮西路副總兵張臣為署都督僉事仍任

辛卯 上御皇極門宣都掌鑾之捷尋易戎縣曰興文縣

瞿九思曰華陽國志漢捷為郡晉鼎輝光於江派今九思

其捷為地耶然所獲諸葛鼓何多也又有銅鉄鍋說者謂

為周鼎此亦易辨且 天子改元獲鼎歸俘武孰甚焉何

論諸葛哉曩諸葛擒孟獲散青羗於五斗壩嗚呼此鑿所

從來也元豐中征之大雨成化中征之亦大雨今又大雨

異哉王者之師若時雨豈謂是耶

薊鎮總兵官戚繼光進左都督昌平鎮總兵官楊四畏進署

都督同知

巡按四川御史孫代奏今年奉旨免刑但去京萬里詔到已

後臣先於元年十一月十三日會決乞於萬曆二年停刑為
准章下法司

甲午工御皇極門引見朝覲兼能官浙江左布政使謝鵬
舉等二十五人而加獎勵各賜金幣鈔宴大理知府史詡不
至下獄貪酷保定知府賈淇等十八人命下法司

朝鮮國王李昭遣禮曹判書李陽原等謝諭改正宗系貢方
物

錄平都掌鑿功進曾省吾右副都御史詹子入國子監總兵
劉顯都督同知餘陞賞有差

丁酉南京右軍都督府僉書張籌充神樞營右副將後軍都
督府僉書楊鯉充五軍營右副將

右通政倪光薦言本司經歷邵守儉於會極門接奏十有三
吏杜守宗以風損其四命下守儉守宗於法司果風損以副
奏上

己亥上御皇極門朝覲官免冠承旨參差不一並不問奪
鴻臚寺堂上官俸半年

辛丑戶部乞遣御史三人覈邊餉命巡按御史兼覈毋違
二期成狼山副總兵李起元充總兵官鎮守浙江

壬子加巡撫陝西右僉都御史部光先右副都御史

太子太保禮部尚書武英殿大學士呂調陽吏部左侍郎兼翰林院侍讀學士掌詹事府事王希烈主禮闈

鴻臚寺少卿陳學曾以各官謝昨班未齊即督禮應天府丞楊標糾劾不免冠俱當罷下吏部

癸丑丁酉賓免以千餘騎欲掠西番且求市涼州命宣大總督檄順義王諭之

戶部以京倉粟少通州倉可支五年乞今年明年盡改輸京倉俟後償之報可

內官監太監張誠等求領真定木稅工部執論不許

乙卯申刻永城縣地震有聲

丙辰入貢回把部剎朶思麻自嘉靖四十一年至京牧獅

求例授官令與指揮僉事錦衣衛帶俸

丁巳海盜林鳳復寇惠潮泊錢澳脅款命兩廣提督殷正茂

福建巡撫劉堯誨令勦之鳳屢敗走至六月壬戌不克獲而還

庚申夜火星犯房宿長汀縣地震裂陷民居四十餘楹

四川進都掌蠻銅鼓九十三有聲者六十有四銅鉄鍋各一

錫兩耳如山製類鼎可函牛蠻其寶之鼓以聲為工易千牛
次易七八百牛皆刻鷺雕螭奇文異狀相傳諸葛物鼓去則
蠻運終藏鼓二三即雄長諸蠻始出劫必擊鼓高山諸蠻聞
聲並四集則推牛享蠻出劫數勝皆鼓之靈也鼓去則蠻運
終

己巳巡撫浙江右副都御史方弘靜罷巡撫應天右僉都御
史張佳胤調南京別用俱被論也

庚午南京戶部右侍郎栗永祿罷

乙亥大理寺右少卿宋儀望為右僉都御史巡撫應天浙江

左布政使謝鵬舉為右副都御史巡撫浙江

是月懷遠猺賊平班師先後斬三千五百四十二人

郭應聘曰懷猺獷悍為諸夷魁眾皆為是役危之廟堂特
屢南顧許以一切便宜誠重之也即徵兵宿將而道議紛
然當其時執事一移豈直盛時有不討之賊而右江士民
有寧宇耶賴天之靈卒就芟夷惟監司覓文法緩督責治
其爭奪時其貿易威懷惠懷即百年可無事也

三月邛大理寺右寺丞王友賢為右少卿

庚辰南京刑部右侍郎曹三暘為南京戶部右侍郎提督糧

儲

辛巳 世廟德妃張氏薨

癸未前兵部左侍郎翁大立為南京刑部右侍郎

丙戌故慶王肅枋謚曰惠

巡按浙江御史蕭廩請祠革除諸臣程本立戴德彝陳性善

方孝孺盧原質盧迥鄭恕王叔英鄭華龔泰卓敬劉璟從之

庚寅萊貢士孫鑛等二百九十九人於皇極殿賜孫繼皋等

及第出身有差

庚子 上大書賜張居正呂調陽宅揆保衡同心夾輔又大

書賜六部正己率屬賜詞臣責難陳善

吏部右侍郎無翰林院侍讀學士陶大臨卒大臨 會稽

人嘉靖丙辰進士授翰林編脩歷令官沉毅寡言笑清介持

身賜祭葬謚文僖贈禮部尚書

壬寅大風晝晦

禮科給事中石應岳奏宗支日煩祿未無措請不繫賜名授

爵者盡弛諸禁聽四民之業其文學才能者許應舉入仕下

禮部

東安縣地震有聲

癸卯撫治鄖陽都御史改提督軍務兼撫治鄖陽
甲辰太常寺少卿陳于陞為南京右通政

給潮州府海防同知印

是月巡撫廣西右副都御史郭應騁移師征古田古底上宋
諸巢賊平之改常安桐木富祿三鎮為巡簡司以下六里分
隸之為以狼制狼也

四 乙卯兵部右侍郎楊巍改吏部

丙午南京太僕寺少卿陸光祖為太常寺少卿

戶部發二十六萬二千餘金脩大同邊墻歲費五萬

戊申戶部右侍郎梁夢龍改兵部

庚戌甘肅總兵官佟應免

癸丑 上始習屬對

罷總督侍郎萬恭巡撫應天右僉都御史張佳胤

甲寅禮部覆禮科林景暘奏續脩大明會典自嘉靖二十八

年至隆慶六年許之

南京禮部尚書尹臺疾去

乙卯巡撫山西右副都御史朱笈為戶部右侍郎

甘州左副總兵署都指揮僉事李宸為署都督僉事總兵官

鎮守甘肅

許刑部司官習講大明律仍堂官試之從刑科給事中劉鉉之請

丙辰前巡撫山東右僉都御史傅希摯總理河道

丁巳故太保無太子太傅錦衣衛左都督朱希孝贈太傅謚忠僖

戊午錦衣衛僉書署都指揮僉書楊俊卿提督街道

慈聖皇太后發三千金建涿州聖母廟工部沮之不聽

己未南京工部尚書林瀛改南京禮部南京太僕寺卿李世

達為右僉都御史巡撫山東

琉球國中山王世子尚永遣陪臣高忠叟表賀登極

辛酉發帑金萬五千脩荊州江隄

禮部奏蜀王置圻以慶宴禮載祖訓會典乞行各衙門遵守其出入承運門會典不載既系舊制遵守如故其非會典所載及雖系前規於典制無常不得越禮瀆擾從之

壬戌吏部左侍郎劉光濟為南京工部尚書大理寺左少卿

王之垣為南京太僕寺卿南京左春坊左庶子余有丁為南

京國子祭酒

前巡撫四川右僉都御史嚴清巡撫山西

乙丑戒諸大臣被論但自陳求退母強辨先是戶科給事中張孫繩劾南京禮部尹臺、奏辨吏部覆議故旨及之

前宣府總兵官都督同知趙奇為前軍都督府僉書前福建總兵官都督僉事俞大猷為後軍都督府僉書

戶部發萬金有奇脩甘肅邊墻初九邊乘障吏卒列垣上曰擺邊譚綸鎮薊值「大入我勢分而弱請罷擺邊專扼塞以垣過零騎以敵臺庇垣諸鎮依之奏請無虛日

丙寅吏部覆吏科左給事中張楚城所請久任之法郡縣官

歷俸六年始陞報曰久任獨責守令難行其各衙門同之

戶部請預開萬曆三年兩淮常股存積鹽共五十九萬四千

七百六十九引一百四十九斤引價三錢五分甘肅減五分

長蘆常股存積鹽共十八萬八百八十五斤引價二錢

山東常股存積鹽共九萬六千一百七十九斤引價一錢

五分報可

庚午傳制封瑞金王在納

癸酉太常寺少卿魯同亨為大理寺左少卿

五丙子吏部尚書張瀚乞休不允先是改各部主事為御史刑

部主事侯克封除官決月與馬吏科張楚城言其驟也
廣寧鎮靖鎮安夏靖等堡各墩臺夜有火光更餘而息
戊寅諭百官禱雨越三日大雨

沙縣大水七月望又如之

刑科給事中歐陽相言久任四事惜人才慎咨訪戒紛更崇
實政從之

己卯夜火星逆行犯氐宿

壬午海寇諸良賢等平俘斬千二百五十人
癸未設左州新寧州儒學時改土為添

乙酉定例會推大臣

故大學士張孚敬孫汝紀入國子監

裁南京馬快船百五十一隻

戊子吏部右侍郎楊巍為左侍郎禮部右侍郎兼翰林院侍
讀學士丁士美改吏部右侍郎

己丑望夜月食

辛卯淮水大決

壬辰上聞張居正父母各年七十特賜緋蟒衣一襲銀錢
二十兩玉花墜七件紗六匹仍賜居正金一鎰居正表謝曰

金錢錯落重頒百鎰之珍綺穀方空兼備六珈之飾忽從天上遙落人間慈光借育於桑榆湛露下沾於草莽考之前史惟唐元振宋王溥登輔相在雙親偕老之年稽諸本朝惟原吉母李賢父蒙存問於二子得君之日

癸巳工部尚書朱衡被劾乞休許之加太子太保初張居正惡衡語李幼滋曰朱鎮山老奸籠絡臺省誰能測其隱者中書舍人喬承華結張氏蒼頭尤七閭之夜告兵科給事中蔡汝賢汝賢曰劾人媚人豈大夫事即請給事中林林即夕草奏時林例推僉事即東吏部令無外尋轉禮科都給事中

汝賢出四川叅議

永平王府鎮國中尉恬燉有罪奪歲祿三之二

庚子復設三江口守備

前南京翰林院侍讀學士華察卒察字子潛無錫人嘉靖

進士選庶吉士授戶部主事改兵部歷車駕郎中改翰林脩撰仍五品俸進侍讀使朝鮮進洗馬遷今秩年七十八所著碧山堂等稿

辛丑先是饒陽王充慈於嘉靖三十三年謫入高墻隆慶初赦出仍國廢猶斬冊印求如鄭王厚烷例禮部議革爵廢人

豈得冒祿今後罪宗入高墻先奪冊印從之

癸卯初開原屬夷王台兵強頗效順至是土蠻小王台吉有

姻兵部謂明諭之仍撫市報可

是月翰林院有白燕內閣蓮花早開張居正併上之

六甲辰朔戶部左侍郎郭朝賓為工部尚書

戊申南京刑部尚書謝登之改戶部尚書總督倉場

趙先遠嗣武靖伯

辛亥南京兵部尚書署右都御史戴才為南京刑部尚書

甲寅工部左侍郎趙錦為南京右都御史

庚午陝西左布政使侯東萊為應天府尹

辛未前南京工部尚書林雲同為南京刑部尚書

巡按浙江御史蕭廩請王守仁從祀孔廟下禮部

七癸酉朔韓王朗錡奏封庶長子璟瀾郡王許之

庚辰南京吏部尚書王大用致仕

癸未給韶州府練兵同知關防

穆宗莊皇帝實錄成

慶成王庶子表樓有罪廢為庶人

吏科給事中劉不息言選法五事核實俸慎改銜公取選嚴

縣令重王官從之

丙戌以實錄成監脩英國公張溶進少保總裁大學士張居
正呂調陽詹中書舍人進呂調陽少保副總裁申時行為少
詹事王錫爵為翰林院侍讀學士侍郎王希烈等各陞俸一
級

丁亥南京太常寺卿殷邁為南京禮部右侍郎南京工部尚
書劉光濟改南京吏部尚書

戊子祀故國南京子祭酒蔡清於鄉從工科左給事中李熙之請
己丑太常寺少卿陸先祖為南京太僕寺卿

戊戌巡撫甘肅右都御史廖逢節調南京

是月馬邑大同積雨四旬壞民居千餘家

八月寅朔賑兩淮竄丁二萬金

癸卯應天府尹侯東萊為右副都御史巡撫甘肅

革曾袞五經博士

甲辰致仕工部左侍郎熊汝達令閑住朱衡勒致仕餘降謫
有差以昭陵被水也

乙巳寶慶知府蔚元康為陝西行太僕寺少卿十月不赴免
其官

光祿寺卿汪宗伊為應天府尹大理寺左少卿曾同亨為光祿寺卿

禮部尚書萬士和請禁縉紳侈靡 上是之但大臣身當率下不得空文戒飭

興化府地震聲如雷

戊申國子祭酒林士章為禮部右侍郎兼翰林院侍讀學士

辛亥吏部題辦事進士不得借差引疾

壬子翰林院侍讀學士王錫爵為國子祭酒仍經筵講官

甲寅德府臨清王載堦薨謚溫懿

戒南京守備內臣受民訟

辛酉賑海豐永安長樂河源諸縣被寇者

壬戌前巡撫福建右僉都御史何寬為南京右副都御史提

督操江

工部右侍郎陳一松提督脩理昭陵工程

乙丑發預備倉糧賑涿永清東安固安武清水災

前巡撫寧夏右副都御史謝淮卒淮字 任丘人嘉靖十

七年進士授戶部主事累晉令官

丁卯岳陽王府輔國中尉英琰永安王府輔國中尉英熿有

罪廢為庶人

己巳蠲賑應朔山陰馬邑大同等縣安東中屯山陰陽山高

山天山镇一等衛災民

立懷遠縣社師三人訓其子弟

庚午蠲淮安揚徐災租仍賑之

九月百蠲公安石首安鄉等縣災租仍賑之

甲戌河南布政司右叅政溫純為太僕寺少卿

斌丹徒丹陽金壇請江田租

議立三屯營儒學已寢之

丁丑命守令不許查盤守巡不許陪巡

己卯夜月犯火星於翼宿

金華縣大水

辛巳刑部請錄囚 慈聖太后欲停之 上問張居正對曰

春生秋殺天道之常 皇上即位以來停刑者再矣糧莠不

除反害嘉穀允惡不去反害良民 上曰然言於 太后從

之

談遷曰江陵本申韓之學其佐治信賞必罰提於風雷冲
主虛已以聽雖 慈聖再宥而執議如初天聽轉圜而姑

息之政誅矣威行萬里坐致富強江陵沒後時相浮慕寬大
歲停刑漫無糾正諸囚白首以老多未伏法惠奸長慝而
咄彼曰江陵刑法家也嗚呼刑法貴得其平豈易言乎哉

壬午兖州鄆城濟南濱州大雨水傷稼
搭蓋神木廠大木

癸未左春坊左中允范應期右春坊右贊善許國主武闈

乙酉山西巡撫兵部右侍郎朱笈致仕

己丑浙江右布政使鄭洛為右副都御史巡撫山西

故徽州同知餘姚胡膏先任光祿寺丞收子鵠侵四百餘金

給事中楊允繩劾之誣其謗訕玄脩論死膏遷同知通賄免
家居被盜復有詐鄉人致死反坐籍產萬金有奇餘宥之

壬辰撫治鄖陽右僉都御史孫應鰲為大理寺卿左副都御

史陳炯為刑部左侍郎

甲午先是宛平大興人王勇等言白城磚臨清歲造百萬枚
今武清土脉不異臨清乞就近改造工部議令王勇等歲造
三十萬俟三年果效議改 上從之

丙申起何維柏左副都御史太僕寺卿王世貞為右副都御
史撫治鄖陽

庚子通政司右通政胡執禮為太僕寺卿

是月泉州大雨水壞廬舍民畜亡筭

番賊攻陷崧山關

前南京國子監正趙蒙吉卒蒙吉字

內江人即貞吉弟

嘉靖辛卯貢士篤志聖學隆慶三年南祭酒姜賢薦其學行

明年拜官匝月引去

十月寅朔 上親享太廟夜雨雹

癸卯提督四夷館太常寺少卿王篆為通政司右通政

前南京太僕寺卿周復俊卒

甲寅前唐府長史袁福徵削籍以冒郵符論徒罪

乙卯總督宣大山西侍郎方逢時奏俺荅進鞍馬弓矢求鉄

錫農器互市并部目其乞量授正副千戶戶部議農器毋

概給鉄錫如朵顏三衛量給若干從之

丁巳兵部司務皮大器言遼東金復蓋三衛素稱腹地近者

破蓋州熊岳堡復犯金復二衛殺掠數萬村堡蕩然金蓋

城堅民稠猶或可守復州城早民稀乞金州守備冬移復州

總督薊遼楊元以島民新附待警分戍從之

遼東招回難民八百三十八人

戊午 上御文華殿講畢語輔臣以 建文帝果逃否張居
正曰國史不載但故老相傳被緇雲游後思歸題詩田州有
涿落江湖四十秋歸來白髮已盈頭之句 上大息命錄詩
進居正曰亡此國之事可為戒不足觀也謹錄皇陵碑及御
製文集以上見創業之艱聖謨之重明日 上讀碑不勝感
痛居正因述 聖祖微時事即位勤儉 上善之

戶科給事中趙參魯言馬政三事曰核內馬內廐費豈四五
萬石芻二百萬餘束馬常五六千匹宜令司禮監查奏曰便
審商每春秋會時先日估次日審蓋乘各官各商畢集易質

虛實曰慎委官請比守衛官例如員闕於騰驤四衛選補報
曰可

雲南梅撥作亂巡撫侍郎鄒應龍總兵官黔國公沐昌祚徵
兵擊斬千餘級平之

己未賑淮徐截漕十六萬石銀六萬餘金

辛酉福建海盜林鳳自彭湖走魁港總兵胡子仁叅將呼良
朋追擊之傳諭番人夾攻鳳遁

壬戌前禮部尚書兼翰林院學士潘晟為南京禮部尚書
免永清等縣水災芻蓋

癸亥 上御文華殿言令宮女內監讀書張居正曰讀書甚善其通今音曉義理宜激勸焉拔其勤慎庶各自奮

甲子 總督宣大山山西侍郎方逢時以俺荅佞佛遣番僧覺義札巴都綱班麻等四人及番官馬你卜刺出塞傳經並效勞

乞覺義陞禪師都綱陞覺義給番官改布從之

甲子 提督操江永康侯徐喬松罷以蕪湖失盜也

乙丑 逃酋王果犯清河游擊王維屏禦之斬五十三級

海西夷王台還所掠八十一人

丙寅 恭順侯吳繼爵掌南京中軍都督府事

丁卯 上視朝親臨除選

己巳 吏部文選司郎中何源為太常寺少卿

十一月 辛未 朔命山海關總兵戚繼光昌平總兵楊畏遠東總兵

李成梁保定總兵傅津並久任有功破格叙齊從勳連總督

劉應節之請

壬申 命西 仍寧夏中衛互市

保定侯梁繼璠為南京提督操江兼管巡江

襄垣王府輔國中尉充校有罪廢為庶人錮鳳陽

丙子 李成梁攻建州衛王果大敗之

平江伯陳王謨魏國公徐邦瑞為南京前府中府僉書
庚辰戶科給事中張孫繩言路楷同楊順殺沈鍊擬戍未赦
其罪宜伏法仍派順妻子部覆從之 上謂 先帝定罪經
朕赦以妄奉奪部堂俸三月司官俸六月
壬午告廟宣建州之捷

丙戌夜月食

丁亥南京吏部右侍郎李崇欽仕

壬辰兵部左侍郎汪道昆移詹其弟道貫入國子監
議脩崇王府例未五十年止給二萬金量葺

丙申涿州胡良河橋成

禮部覆宣大總督方逢時以俺答貢被元年增百有四員今
後宜加節制毋遽增從之

庚子英國公張溶代祀南郊

十 仁辛丑朔 上御皇極殿受朝賀

壬寅戶科給事中趙參魯論南京守備少監張進酌酒禁地
追辱科臣王願謫外初進醉橫其長業榜之數十請旨逮繫
參魯又激論張居正謂欺幼主不道意以悅馮保也保德之
居正稍說其裁抑內黨毋預六曹事毋輕銜命出外於是內

黨怨居正其刑科給事中鄭岳浙江道御史麻永吉等罰歲俸

乙巳禁左道

丁未北貢市成加方逢時左都御史兼官如故餘各賜金幣有差

壬子張居正上職官書屏奏曰安民之要在於知人辨論官方必考其素顧人主尊居九重坐運四方於臣下之姓名貫址尚不能知又安能一別其才否而黜陟之乎朝中之間百司庶府尚不能識又安能旁燭四方部國之遠乎謹查兩

京各内外文武官府部而下知府而上姓名籍貫及出身資格造屏并繪天下疆域之圖左文右武各浮帖以便更換請列文華殿後朝夕省覽如其官闕該部推舉即知原繫某官果堪任否某地有事即知其見任能辦此事否臣等日侍左右皇上可詢問商確一指顧間而道里險易職務繁簡官吏賢否舉莫逃於聖鑒矣

癸丑詔故新建伯王守仁從祀孔廟

朝鮮國王李昖遣吏曹叅判安自裕賀冬至節戶曹叅議趙澄等貢馬

乙卯倭陷廣東銅鼓碣石雙魚城官兵追敗之進總兵張元
勲都督同知

庚申南京兵部右侍郎翁大立改南京吏部

壬戌山西長治縣仇氏六世同居旌其門曰尚義

晉府知奕嗣寧河王慎鍵嗣河東王

清軍御史余乾貞回自畿內河南都察院請回道視事 上

謂往例姜滿考察今概回道豈人稱其職乎宜申往例限

代不許枉道回家

乙丑巡撫鳳陽右副都御史王宗沐為南京刑部右侍郎

丙寅兵部奏武選 上御皇極殿臨注

四川土舍楊正魁襲耶長官司正長官仍不支俸

丁卯前兵部右侍郎張紳總督漕運兼巡撫鳳陽右副都御

史

閏二月丙子巡撫河南右副都御史吳道直為兵部右侍郎

戊寅松山首款塞貢市成

慶府倪僊嗣弘農王

己卯前宣府巡撫右都御史孟重巡撫河南

增湖州府同知駐烏鎮捕盜

辛巳順天府尹施篤臣疾去

癸未巡按浙江御史田樂乞除方孝孺姻黨成籍三百七十餘戶不允

乙酉山東左布政使曹科為順天府尹

丁亥上大書弼予一人永保天命賜張居正明日居正侍日講曰帝王之學常務其大自堯舜至唐宋賢主皆修德行政治世安民不以一藝漢成帝知音律能吹簫度曲梁武帝陳後主隋煬帝宋徽宗寧宗皆能文書善畫無救於亂世則君德之大豈沾一藝哉

己丑先是西、賓、兔、求、西、河、互、市、邀、索、刀、伏、村、莊、朝、議、絕、之、兵、部、言、以、一、部、啟、各、鎮、拒、絕、之、心、非、計、也、宜、諭、俺、答、令、其、改、圖、遂、命、督、撫、石、茂、華、侯、東、萊、酌、之

庚寅上就講文華殿問張居正元夕烟火鰲山祖制子曰非也成化間以奉母后時多諫沮今新政宜裁上曰然太監馮保旁曰他日久治或可間舉上曰觀其一餘可知矣居正曰明年雖禫終繼此需大婚又皇弟潞王出閣諸公主釐降各費數十萬宜預節省上曰朕極知民窮居正請減元日賜齋上大然之

癸巳前工部尚書胡松平松字

滁人正德甲戌進士除

同知擢御史論朱寧陸完等不法歷官中外卓有丰裁亦可師表一代矣

是月番賊掠階州執守備范延武知州徐旭掠民財贖之是年海盜寇潮陽殺縣丞黃時春

平遙縣撫民丘經等復叛劫知縣滕表章明年始平

乙亥萬曆三年

正朔丑朔揚州鎮江地震

丁未 上享太廟見七十二衛陪祀武官祭服藍纓令該部

另作臨祭給發祭畢歸太常寺

庚戌四川屯田歸併清軍道副使驛傳歸併鹽茶水利道會事

涿倭攻陷雙魚所

辛亥諭禮部朕今春長髮其擇吉具儀注張居正曰部舊無例臣攷閣稿惟英宗皇帝實錄有正統八年六月六日長髮告奉先殿亦未聞儀注蓋此禮本行宮中故外不得而詳也 陛下前東宮時行冠禮無煩該部容臣先期略具儀節

工是之
密雲地震

甲寅先是巡撫鳳陽都御史王宗沐訪募淮徐義勇王忻等三百餘人令捕盜果効力給冠帶兵部謂所慮為盜之人即用以治盜誠救業安民之良策也從之

己未工部左侍郎杜拯致仕

壬戌駙馬都尉許從誠乞乘肩輿不許

癸亥增梧州鹽運司副提舉

順天府尹施篤臣卒賜祭葬

甘州石硤口備禦都司王朝被番人射死

甲子 上欲奉 孝烈皇后 孝恪皇太后神主於奉先殿

諭禮部

增山西行太僕寺少卿兼按察司僉事專理宣大屯牧

乙丑覈各撫按官未結事件鳳陽巡撫王宗沐巡按張更化

廣東巡按張守約浙江巡按蕭廩並鐫俸三月

丙寅以安慶衛軍變安慶衛指揮僉事馬負圖遣戍

戊辰脩南京武英奉先二殿大庖厨各庫

宣府東路白允中為署都督僉事充神機營左副將

復福建鹽運司判官

己巳巡按廣西御史李采非請卹懷遠知縣馬希武不許初
希武招撫土徭俱願編氓因無城督役過峻匠者謂市徭俟
築城畢勒若曹耳遂復亂殺希武及典史余冕

時套據西海嘉峪關總督右都御史石茂華乞收撫番族
如國初授官秩勅印准世襲授田廬藉為羽翼從之

二癸酉夜有大星青白光自參宿派翼宿

甲戌湖廣江西地震

乙亥 上是日長髮

翰林院脩撰李維禎為陝西布政司右參議編脩林偕春為
湖廣按察副使

庚辰南京戶科給事中余懋學上五事崇禎大親謬謬慎名
器戒紛更防諛佞其崇大曰 陛下臨御以來立考成之典
復久任之規申考憲之條嚴遲限之罰大小臣工鯁一奉職
然政嚴則若法密則擾非所以培元氣存大體也昔臯陶以
寬簡贊帝舜姬旦以惇大告成王願 陛下遠憲二君留心
柔克持大體而掠繁文矜微瑕而宥小眚綸綍本之和平而
不數下切責之旨政令依於忠厚而不專尚刻覈之實更乞

明詔群吏洗滌繁苛持法者依踪鸞鳳司牧者績績保章廟
堂議事無竭澤以焚林憂諫論人勿索瘢於洗垢庶幾寬嚴
相濟政是以和其慎名器曰曩歲陛下加恩宮臣太監鄭
真廢姪珙錦衣千戶未幾求管事未幾求諾命俱未下部議
允其請舊制難制邪心無厭漸不可長也外廷諸臣有陳必
付有司查例獨內臣不用例官府一體義或不如是又大臣
卹典實寓旌別近禮科都給事中朱南雍參原任尚書傅烱
公論不容不冝祭墓蒙明旨竟從初命夫科臣之言是則恩
數中止不為過也科臣之言未確則勘明後予不為遲也今
既不咎科臣而又輒予傅烱始之予也為過後之予也為失
矣其防諛佞曰近訪部題覆邊功往首列閣臣盛誇督牧
然猶曰運籌宣力例當叙也至涿州橋成該部議功夸述閣
臣司禮例雖沿舊詞涉獻諛願申飭該部題覆且直述巔末
與將士俘獲之數邊臣指揮之略上請優賚至閣臣翼贊近
臣侍衛則聖衷夙鑒國典具存不得輒加贊揚以長諛佞
上怒切責之削其籍

辛巳通政司使王好問為工部右侍郎仍署通政司事
南京吏部右侍郎翁大立為刑部左侍郎上因諭吏部南

京職務清簡官不必備先朝有一人兼六部者今後員闕不
系要職不必一、推補

賑應朔大同馬邑懷仁等縣大同陽和等衛饑民

作京營戰車千四百四十輛

癸未土蠻分犯遼東

甲申工部右侍郎陳一松為左侍郎南京兵部右侍郎凌雲

翼為工部右侍郎

已丑屬夷長昂糾眾入犯我兵逐之獲其叔長禿其親屬部
落俱哀乞堅教兵部謂必長昂悔禍歸我所掠詣闕補貢而

後可上然之

辛卯先是靖江王府擅婚子女先帝奪祿三之二而各宗

貧困撫按謂其遠在天末且父祖相沿之失非身干之也於
是皆給全祿戒各藩毋例引

寧夏邊墻成

壬辰賑保德代疇等七縣

癸巳宣府西順聖川及懷安保晏右衛等處災

總兵官李成梁襲土蠻營破之引去時東駐鵬背山西駐

廣平山

廣東總兵張元勳大破倭於儒峒擒斬八百餘級
乙未翰林編脩戴洵為國子司業

丙申張居正議起居注

承運庫以上供漸匱檄戶部移太倉備邊之儲尚書王國光
謂盡列積年京庫欠目且云所移於太倉者幾二百萬矣倘
有意外何以待之 工責戶部檄各撫按嚴督有司完賦否

則以不職論

吏部左侍郎楊巍乞終養許之

義州衛地震

丁酉巡撫大同右僉都御史申佐以京察自陳命量調

戊戌奉遷 孝烈皇后 孝恪皇后神位於永陵

巡撫雲南右僉都御史鄒應龍自陳許致仕

總理河道右僉都御史傅希摯請開泇河

己亥夜永平各臺旂上俱有火光

三廟子朔 上覽帝鑑圖說至董宣強項事嘉歎久之語張居

正等曰彼公主也尚不私庇家奴如此外戚家何可不守法

今戚里間朕念慈幃多曲處渠知寧之也

翰林脩撰王家屏徐顯卿張位于慎行沈懋孝編脩沈一貫

編纂章奏日講官丁士美等六人保直汪起居
甲辰提督鴈門三關兼巡撫山西右僉都御史鄭洛改巡撫
大同贊理軍務
日講官吏部右侍郎丁士美為左侍郎左副都御史何維柏
為吏部右侍郎

丙午四川永寧倉改隸貴州

丁未前江西巡撫右副都御史沈應時為提督鴈門等關兼
巡撫山西太常寺卿王凝為右副都御史巡撫雲南兼建昌
畢節等處軍務巡撫陝西右副都御史部光先為左副都御

史回院

廣寧左右中衛雨塵義州後屯衛雨泥沙俱黃色

己酉前戶部右侍郎朱笈卒

南京太僕寺卿陸光祖為太常寺卿

庚戌左僉都御史陳省為右副都御史巡撫陝西

癸丑南京鴻臚寺卿孫鏞為太常寺少卿提督四夷館尚書

司少卿耿定向為太僕寺少卿

嘉定王載瑞薨

乙卯福建左布政使萬思謙為南京太常寺卿前巡撫應天
右僉都御史張佳胤為南京鴻臚寺卿

丁巳太僕寺少卿耿定向為右僉都御史

泗河之議工科都給事中侯于趙請集議有旨集議亦具文
甲可乙否其命于趙親往會傳希擊及按臣決之

己未行人楊言虞德燁中書舍人周良寅為給事中言吏科

良寅戶科德燁兵科行人王曉陳功秦時言中書舍人王應

乾劉天衢金階為試御史

提督兩廣兵部尚書殷正茂追勦雙

山寇

是春倭寇至馬蹟山洋金山叅將詹廷傑等捕斬七十六級

燔十六艘溺者甚衆

瞿九思曰倭奴動稱造舟千百艘此皆虛語耳其為費甚

大不易造近以閩人導之造重底遂易行異哉馬洋之捷

犁沈倭舟凡一十六艘爛洪口凡一艘以臣所聞倭舟大

者可容三百人次一二百人或七八十人今之赴水而死

者曷可勝筭乎要之江海之戰非其所長往、聯虛舟張

弱簾而以空發吾之先鋒蓋所從來久遠矣

四月己朔日食既

四川左布政使陳絳為光祿寺卿

申嚴各撫按交代違限之禁

辛未以山西河東鹽法改屬按察司清軍驛傳副使

壬申 上因日食作牙牌手書其上曰謹天戒任賢能親賢

臣遠嬖佞明賞罰謹出入慎起居節飲食收放心存敬畏納

忠言節財用

癸酉遼東總兵官左都督李成梁子如松廕都指揮同知世

襲

甲戌俺荅子賓兔駐牧西海役屬見革白利等番隨令傳松

潘番人託迎佛造寺屢傳警息四川撫按曾省吾郭莊以聞

乞令陝西總督諭俺荅嚴戢賓兔毋窺他境

南京戶部尚書傅頤致仕

巡按陝西御史趙燿引疾命部院覈之

丙子諭禮部禱雨

茂州刁農等夷千二百十九人內附比於編氓許之

丁丑司設監太監曹憲等乞治宮中帷帳茵褥等物關票司

禮監查議裁減不拘往例太監馮保因言諸事誠宜減省

上閱憲奏用紵絲四百匹布萬三千餘匹曰歲辦幾何而費

若是憲等具言供御所需皆不可已 上命覈之於是保以
實聞戒於舊 上善之

戶部左侍郎陳瓚為南京戶部尚書

庚辰河南巡撫以鈞州犯御名請改易曰禹州

辛巳土魯番酋速壇馬黑麻阿力卜把都兒新立為王入貢

壬戌宥故左都督陸炳餘贖張居正言其從幸衛輝脫 皇

祖於火也

同華朝邑白水郃陽澄城韓城華陰蒲城改屬潼關兵備道
渭南耀乾長安等縣屬關內兵備道

甲申傳制封載圭衛王瑄鐸齊東王常洽荆王常盞安城王

誼涵秦世子璟潤長吉王朗銳長洲王朗鏗高淳王幹陸南

充王倪僕弘農王知昊寧河王慎鍵河東王知燼寧化王翊

銳永豐王厚燧順昌王勤鏞工洛王華銖永安王憲煥長楊

王褒煊萬安王任昌靖江王

貴州麻向太華二司遺賊阿科合董昂等焚劫太華吉陽巡
撫都御史羅瑤徵兵勦之頗有功巡按御史楊允中論其輕

勤聽勘

乙酉土蠻聲言犯山海關直抵開原命薊遼各嚴備互援

裁四川滄井鹽課司

戶部右侍郎李幼滋為左侍郎大理寺卿孫應鰲為戶部右侍郎

庚寅故南京工部左侍郎贈禮部尚書程文德謚文恭

辛卯南京光祿寺卿劉一儒為太常寺卿

癸巳吏部擬大名道兵備副使陶大順於湖廣大順以職方

郎中陞未逾月至是上見其名語閣臣曰是數日前領勅

何遽轉也張居正曰大順乃故講官大臨之兄大臨卒未幾

大順子尚寶司丞允淳又卒皆未葬大順因大名去鄉遠例

不得過家故求吏部改近便葬上從之

隆平侯張桐卒

甲午淮徐大水

裁山東按察司屯田鹽法僉事改屯田屬兵巡道鹽法屬清

軍副使

大理寺右少卿王友賢為南京光祿寺卿

是月總督石茂華討階州番河州叅將陳堂先退北州叅將

劉世英失利守備朱憲史經死之

五朔戌朔襄陽鄖陽南陽地震三日

己亥張居正論督學試郡縣入學太濫宜拔其尤一人報可
談遷曰江陵綜覈名實力矯夙玩于慮一失在汰郡縣諸
生彼萬室之邑絃誦相聞僅錄其一青、子矜遂曾怨於
天下謂媚嫉之尤三尺之孺亦交口詈之矣宰相能樹人
亦何惜一芹為此曹子資詎耶

俺答言賓免因甘肅不許開市苦寧夏途遠宣大總督方逢
時以聞且言在西陲善處兵部覆議陝西鎮臣每遇「警報
坐視諉其責於宣大上切責石茂華等仍相機撫禦
信陽地震

禁山西五臺繁峙二縣奸民結聚盜礦

壬戌召兵部尚書譚綸於會極門手詔問遼東「報內犯朕
憂之旬日何又杳然該部竟不以聞先是張居正言其事故
有是問

癸亥景城縣天鳴者三有涿星二晝隕化為石黑色一

乙丑巡撫湖廣右僉都御史趙賢為左僉都御史回院南京
大理寺卿陶承學為大理寺卿

丁卯裁孟縣縣丞增徐溝縣丞

是月西海「賓免侵諸番以報其掠馬因圖請市巡撫甘肅

侯東萊言河西彫瘵開市為難顧諸酋懸待拒之生患臣謂
苟可安邊何惜一隸人垣而不以羨彼也遂立大市於甘州
小市於莊浪

六 戊辰朔杭州嘉興紹興寧波大風海道滄人畜廬舍亡筭
己巳暹羅國及刺麻僧各入貢

湖廣左布政使陳瑞為右副都御史巡撫湖廣應天府尹汪
宗伊為南京大理寺卿河南左布政使吳文華為應天府尹
壬申陝西總督石茂華巡撫陳省奏麻山閩番賊作亂已勦
盡但為隣番所掩 工切責茂華

癸酉提督兩廣殷正茂遣副總兵梁守愚陳璘勦高要六灣
諸山賊刻期發璘失期賊得遁璘殺降冒功頃之裴應章劾
守愚賄狀守愚坐法免

乙亥左都御史葛守禮致仕加太子太保給月廩與皂

丙子裁揚州理鹽通判於儀真

戊寅吏部言甲科舉貢三途並用

己卯雷擊建極殿鴟吻

壬午南京戶部尚書陳瓚為左都御史

乙酉提督兩廣兵部尚書殷正茂為南京戶部尚書

吏部定官生恩生選法

河間同知李邦奇景州知州劉樞交河知縣董廷照俱遠謁
為巡按御史賀一桂所劾上獎一桂免邦奇等官或曰迎
者實阜城知縣其非董廷照也時知其枉而不敢白

戊子工部右侍郎凌雲翼為兵部左侍郎兼右僉都御史提
督兩廣軍務

福建福汀漳廣東潮陽地震

庚寅先是雲南臨安土官普崇正誘儂賊占地巡撫鄒應龍
勦滅之改土為派兵部謂祖呆時平定襄區力詘群雄豈

不能盡天下而郡縣之而不盡然者良有深意辟之蜂蟻今
以類相從亦王者不深治之意改土為派宜新撫王凝熟計
以聞工然之

翰林院庶吉士張程為禮部主事

兵部左侍郎汪道昆歸省

辛卯工科都給事中侯于趙言沕河可已部覆如之上切
責于趙與傅希摯原議大異希摯久歷河道豈敢謾興此役
必諸臣避事沮撓耳

壬辰南京右副都御史趙錦為南京刑部尚書南京刑部右

侍郎王宗沐為工部左侍郎

夜雷震瑞門鳴吻

甲午命官吏非公遣不許乘傳張氏家奴過高郵知州漳浦吳顯奉令甲力裁之相家奴入州治大詬評徐、誘顯入其舟出數婢奪印去顯曰我奉若相君法何難我也監司急馳解得罷居正亦竟不問

暹羅國乞補印脩貢許之

乙未兵部右侍郎吳道直為左侍郎巡撫四川右副都御史曾省吾為兵部右侍郎前兵部右侍郎吳百朋為南京右都

御史

七戊戌巡撫貴州右副都御史羅瑛改巡撫四川

庶子厲夷王台縛建州衛都指揮使王果及家室二十七人以獻初罷王果市賞果改名科勻素善星術及走重古路自推命不當死尋就縛

瞿九思曰建州置衛蓋自永樂時舊矣然未嘗有倔強如果者傳曰無故輒殺人此上帝之禁也以果而殺僇我漢將軍殆如亂麻嗚呼悲夫假令果如直諸速祀亥則何可易擒乎卒走王台旋就縛此正天之所以速果死也何乃

罪命哉何乃罪命哉

辛丑起嚴清右僉都御史巡撫貴州

壬寅吏部尚書張瀚秩滿晉太子少保

丁未上御日講畢有頃中官持尚書至微子之命篇用黃

紙乙其處以示閣臣上讀書日有程閣臣歎美

山東左布政使董世彥為右副都御史巡撫陝西

戊申鎮守山西總兵官劉國勅免

庚戌神機營左副將白允中充總兵官鎮守山西

修紫荆等處邊墻

壬子巡撫山東右副都御史李世達劾濟南知府隗邦衡貪

刻且言其羽翼甚衆上褫邦衡職戒諭撫按官彼有何翼

羽敢撓公法

癸丑上御文華殿講畢遣中官問張居正疾又手封藥賜

之

甲寅日講官丁士美夏去翰林脩撰王豕屏補之

禮部右侍郎兼翰林院侍讀學士馬自強為吏部左侍郎

乙卯張居正疾愈入直

丙辰穆廟英妃魏氏薨

監生梁椿欽禮部主事郭子直錦衣千戶李如栢等私放砲
聲徹大內謫子直馬邑典史椿削籍因切責部院不勒率其
屬尚書張瀚萬士和等各引咎乃已

甲子王果俘至京

乙丑南京太常寺博士王希元行人趙世勛彭應時知縣朱
東光李冲奎王道成郭四維戴光啟徐貞明王蔚推官劉尊
賢吳如綸蕭考諸大倫為給事中蔚應時南京行人董光裕
房如式知縣邢珩雷嘉祥王民順李尚默傳應楨鄭宗學董
裕沈涵賈如棧帥祥喬巖李時成劉應元李禎陳用賓黃應

坤陳世賢胡宥唐裔丁元復于應昌林應訓推官虞懷忠錢
岱教鯤為試監察御史

八 丙寅朔翰林脩撰日講官王家屏同申時行等直起居注侍
讀羅萬化編纂章奏

己巳初鑄各省驛傳道專制關防如提學兵備例

辛未加王台龍虎將軍其勲衛二子俱都督僉事賜金幣初
吏部擬加柱國閣另擬上

于慎行曰蠻夷之長即儼然稱公卿殊襲朝廷之體而彼
又不知為何官也龍虎將軍者公卿無此官以號蠻夷彼

以其名壯必甚自喜而於名器無損人之識趣高下於此
迥然

瞿九思曰世傳海西為金遼遺種豈其然乎以臣而觀開
原天所以限北也方王台時北最倔強卒不能越海
西飲馬於遼瀋東西南豈非王台能扼其左臂哉及觀王
台僂祀其三獻王果則又未嘗不壯其忠烈故特志之以
示塞外諸蠻夷也

壬申復故巡撫延綏右僉都御史張子立官

徵光祿寺十萬金戶科都給事中光懋等言其不繼不聽

丙戌環球入貢

戊子淮安鳳陽楊徐大水蠲夏稅折徵秋糧一年

庚寅安鄉伯張佐掌前府事

壬辰前廣西按察僉事霍與瑕為江西按察僉事

甲午上御午門樓王果獻俘謂張居正曰此先生幃幄功
也因入樓觀成祖御槍久之乃還宮

戶部右侍郎孫應鰲為禮部右侍郎署國子祭酒

順昌縣倍稔稻一莖四五十穗

九
戊戌山東撫按奏郟城費縣闕官以東平州同知楊果判官

趙政攝印但由都吏較士宜別委有旨楊果趙政既才堪治民可陞知縣何物資格也

吏部右侍郎上八事專責成以覈實政廣辟薦以弘大公慎

陞擢以懷永圖議調請以勵進脩嚴追治以警貪酷均要職

以通堙塞重王官以責職守集衆見以一政體上從之

己亥太倉華亭上海常熟嘉定丹徒丹陽以水災折徵秋糧

十之三

巡撫雲南王凝奏廣南府土舍儂文舉擒獻劇寇餘乞宥之

報可

甲子日講官吏部左侍郎兼翰林院侍讀學士馬自強為禮

部尚書兼翰林院學士太僕寺卿胡執禮為光祿寺卿

前大同總兵官馬芳為前軍都督府僉書四川總兵官郭成

為南京後軍都督府僉書

是月海盜林鳳克呂宋國自稱國王又來彭湖屯魁港總督

劉堯誨遣諭呂宋國招番兵五千人襲破之幾盡僅舟四十

餘艘鳳走潮州

呂宋獻俘請入貢比暹羅真臘泉州知府常熟陸一鳳曰不

聞職方氏有呂宋也奈何以小蠻效順煩我鴻臚遂止

瞿九思曰臣考呂宋國非首夷乃擊破林鳳壯矣哉及貢
奉方物尤為至順然林道乾亦入暹羅矣幾為乾敗何能
不及呂宋也聞廣事臣聞有爭兢殆與嘉靖中江廣征張
璉湖蜀征黃巾事無異人臣尚同寅協恭和衷哉

十羽寅設廣東按察副使巡視海道駐東莞

應天府尹陳絳劾免

丁卯京師地震

戊辰前巡撫雲南鄒應龍削籍追論其儂魁再敗也

瞿九思曰陳山人所著西征記鄒司馬抑何威武也至別

者電此不過遣一土舍足公事矣竟為儂文舉所擒哉強
弩之末不能穿魯縞然與否與至謂納樓改派事廷議亦
不以為然何哉納樓在元世或屬阿寧或屬鄯闡要之不
下二千戶也

命停刑以初行郊禮也

己巳吏部右侍郎何維柏為左侍郎刑部右侍郎陳炯改吏
部右侍郎總督漕運巡撫鳳陽兵部右侍郎王宗沐為刑部
左侍郎

庚午南京織染局右監丞劉佐等下南京法司以織幣不工

也

辛未南京太僕寺卿王之垣為太僕寺卿前巡撫甘肅右僉
都御史廖逢節為南京太僕寺卿

壬申許河西赴甘鎮開市松山賓鬼許市莊浪初俺答念
吉囊渡黃河久託言鉄嶺山有生佛出命子賓鬼往建寺畫
結群羌至是賓鬼令熟番聲言犯邊且請俺答渡河迎佛使
使十輩假道求茶食

河間滄州天津大雨水

山東布政司右叅政永平兵備道宋可約為右副都御史巡

撫延綏贊理軍務提督操江南京右副都御史何寬為工部
右侍郎

定西侯蔣佑卒

癸酉大理寺右少卿何起鳴為南京太僕寺卿

甲戌鎮朔將軍左軍都督同知宣府總兵官雷龍進左都督
廣西左布政使程嗣功為應天府尹

乙亥通政司使王篆為南京右副都御史提督操江

丙子俺答乞佛像蟒段且城市成求賜名賜城曰歸化量給
經像

尚寶司丞陸樹德為應天府丞

丁丑翰林院脩撰趙志臯田一雋注起居

提督四夷館太常寺少卿孫鑑為通政司右通政

己卯岷州衛地震

尚寶司丞張孟男為尚寶司卿福建布政司右叅政徐中行

為福建按察使

辛巳工御文華殿命中官持論語出指南容三復白圭問

閣臣白圭何詩也張居正言其肯以復

癸未巡按直隸御史暴孟奇張憲祥等各報論囚乃萬曆二

年十一月所上

上怪之以問閣臣少雨張居正入奏曰去

年刑部主事劉體道同關內關外巡按暴孟奇張憲祥論囚

即令體道親骨報命非二臣遣奏也工曰何至今始進曰

刑曹借差例還家限一年故始封進也命下體道於都察院

尋謫外

甲申翰林院庶吉士孫訓知縣武尚耕為禮科給事中知縣

李東魯士焚龔懋賢推官劉倬陳薦為試監察御史

丙戌申嚴貢士入監之法

戊子工部左侍郎陳一松予告

定南京編審鋪戶之期五年一更
限各省御史差期

己丑岷州地震自是日至十八日震百餘是日沱州亦震

庚寅吏部文選郎中方九功為太常寺少卿提督四夷館

辛卯冀北道兵備右叅議張希稷以巡按陳文衡劾其貪虐

擬降調吏部駁貪虐何止降調遂免官聽勘

壬辰太監張宏請遣內臣權真定木稅部科執奏不聽

甲午李言恭嗣臨淮侯庭竹子

定郊宴張四維坐一品末

十月丁酉張居正上郊禮新舊圖攷曰高皇帝初制分祀者

十年竟合祀以古今異宜適時為順故舉以歲首人之始也

卜以春初時之和也歲惟一出事之節也為屋而祭行之便

也百六十年列聖相仍今以冬至極寒而裸獻於星露之下

夏至盛暑而駿奔於炎歊之中一歲之間六飛再駕以時以

義斯為疾矣且成祖文皇帝再造宇宙功同開創配享百

餘年一朝而罷之於人情亦有大不安者宜遵高皇帝之

定制歲一合祀奉二祖並配謹稽新舊規制伏俟聖裁

辰刻四川松潘衛有彗星二各長丈餘自東涿西南天鼓隨

鳴

工部右侍郎何寬為左侍郎大理寺卿陶承學為工部右侍郎

戊戌庶吉士劉楷為兵科給事中

庚子 上視牲南郊幸齋宮召張居正子入侍

辛丑山西巡撫右副都御史沈應時為大理寺卿總督漕運

兼巡撫鳳陽張紳為刑部右侍郎

甲辰 上詣郊壇

乙巳 上祀南郊還御皇極殿行慶成禮

工科給事中徐貞明言勾軍之累

前兵部左侍郎吳桂芳為總督漕運兼提督軍務巡撫鳳陽

山西布政司右叅政崔鏞為右僉都御史提督鴈門等關兼

巡撫山西

癸丑蔣建元嗣定西侯蔣祐子

丙辰海盜林鳳劫柘林靖海碣石

戊午 上御文華殿兵科給事中蕭彥言吏治三事文移尚

省物議當嚴本原當敦 上然之

辛酉林鳳復犯福建不利更入暹港

十月乙丑朔祈雨雪

考選京衛軍政

丁卯吏部擬升瑞安主簿汪玄壽縣職上不許於是吏科
給事中王希元發其節閱私書極言刀筆吏不可為正印有
司兼刺撫按吏部

己巳上御文華殿張居正言王希元跡入覽否上曰所

云私帖似指吏部而無指名何也居正曰人臣告君宜明顯
使此事果有之彼自抵法無亦不至枉讎也

庚午吏部尚書張瀚疏辨奪王希元俸半年

禮部尚書馬自强請幸太學俟明歲又請籍田俟三五年

掌府事宣城伯衛國本劾免

入平堡副總兵曹蓋馳援斬十一級李成梁邀其歸路
斬百九十六級御史劉臺報捷上以御史例不報捷兵部
覆疏為解從之

辛未上御文華殿謂張居正今大創或可教年無事對
曰往時損軍之法太嚴故將領觀望不敢當今連年數傷
至四五百人此乃兵血戰宜寬論損折以作其氣上納之
上又曰元夕鰲山向罷之今雖禫後念鰲山費巨甚且風

火不測其併烟火罷之

環球入貢

壬申總督東廠司禮太監馮保彙奏三年緝獲功蔭錦衣衛百戶

時入川堡射斷事李斌死之游擊劉景嶽備禦楊紹勳失利把總劉進忠死之

癸酉提督兩廣軍務殷正茂請勅肇慶府羅勇徭賊從之

乙亥巡撫應天宋儀望進右副都御史仍巡撫

壬午叙連東大捷李成梁蔭錦衣衛正千戶張學顏蔭子入

國子監

癸未通山王

薨

乙酉河南御史傅應楨上三事存敬畏以純君德蠲租稅以甦民困叙言官以勵忠告上怒其三不足之說下鎮撫司

尋成定海衛

丁亥科給事中徐貞明御史李楨為嚴各謫外以隨視應禎入獄也

癸巳議築海鹽平湖捍海石塘

申請勾軍丁之法

是冬甘鎮軍餉本折間給冬應折色兵備副使鄒廷望以金
少盡給粟伍長石明挾金不可得明日吾叛從明日鼓衆
三百人焚公門入詔廷望窘全與折色巡撫侯東萊購明輩
六人下獄餘不問調廷望陝西石明等論死

程